

Labare á higa na a puwetaa YUHANNA

*Yaisu *Almasiihu nane elva á Dadaamiya*

¹ Kwaye am fakta, ba lauktu Dadaamiya á nderá duksa keni, edda una tá daháná an elva á Dadaamiya na ndza ankwá tsawe. Elva nanna ndza ta ba kerde an Dadaamiya, elva nanna Dadaamiya. ² Daaci elva nanna wá, kwaye am fakta ta ba kerde an Dadaamiya. ³ Bademme á duksa, Dadaamiya a nderanaa áte erva an nane. Baaka názena ni ta nderanaa áte erva an nane ka. ⁴ Elva nanna wá, á vatertá ba nane shifa ge emnde. Shifa nanna maa, ankwá á vaterte parakkire á jirire ge emnde. ⁵ Parakkire nanna ankwá á mbe am tabedammire, amá dzegwánka tabedammire ganakini á emtsanaametsa.

Elva áte Yuhanna slemaga baptisma

⁶ Ankwá ura ndza a belanaa Dadaamiya werre, zhera-aara Yuhanna. ⁷ Sawa-aara ge nane wá, ndza a sawa ge balateraa elva á parakkire nanna ge emnde, ganakini a fartarfe emnde áte parakkire nanna. ⁸ Nane-ka una parakkire nanna; nane wá, á maga ba seydire á elva á parakkire nanna. ⁹ Parakkire nanna wá, parakkire á jirire, a semhe á sem huđe á duniya wá, ankwá á mbe am dágave á emnde bademme, á maraterá parakkire á jirire.

¹⁰ Edda una ni tá dʼahaná an elva á Dadaamiya na wá, ndza á ba am huɗe á duniya. Ba duniya na keni Dadaamiya a nderanaa á ba áte erva an ɲane, amá duniya diseka ɲane ɗekideki. ¹¹ ɲane a sem larde-aara ba ge ɲane, amá emnde-aara ɲanna liyarká. ¹² Aley keni wá, tá aɲkwa emnde na ni ta lyevaa ɲane, fartarfe áte ɲane. Ge emnde ɲanna wá, a naba vaterte barama á gev egdzara á Dadaamiya. ¹³ Garevka egdzara á Dadaamiya áte una tá yaná emndimagwaha am duniya na, amá Dadaamiya a vaterta shifa aɲwaslire, geni tá gevge egdzara-aara.

¹⁴ Elva á Dadaamiya gevge urimagwe, a se nja á ba am dáɗave á miya, huɗe-aara palle áte emnde, ura jirire an tsaka ire, namiyáɲna yaikkire-aara, yaikkire na ni a vanta a Eddeɲara ge ɲane, Egdza-aara palle ba ɲane na. ¹⁵ Am sarte na a puwete ice-aara áte ɲane Yuhanna, a naba kante kwára, a ba ɲane á elvan ge emnde: «Náwa edda una ndza ya bakuraa elva-aara, á ba iya: Aɲkwa á sawa ura am iga-aaruwa, amá á jiyuje ɲane an ɲgahire na. Adaba kwaye zlaɓe yarika ya, amá ɲane aɲkwa.»

¹⁶ Adaba ɲane a hyephe a jauka, a gamiyar barka an tsaka ire ge miya baɗemme. ¹⁷ Dadaamiya a sateraa *tawraitá ge emnde á kya erva an Muusa, amá tara ɲgurna-aara antara jirire-aara baɗemme wá, a sanaa á ba áte erva an Yaisu *Almasiihu. ¹⁸ Baaka ura ndza nanna Dadaamiya ɗekideki, amá Egdza-aara na palle ba ɲane, ta ba palle an Dadaamiya na, a se maratersaa ɲane Dadaamiya ge emnde.

*Seydire á Yuhanna slemaga baptisma
(Mat. 3:1-12; Mark. 1:1-8; Luka 3:1-18)*

¹⁹ Vacite umele, male-aha á Yahudiya-aha am Urusaliima ta belaa *liman-aha antara *Lai-wiŋkau-aha á deza Yuhanna geni tá de ndavanundave ŋane mu ware. ²⁰ Yuhanna kwalaaka, a naba vaterte jawápa: «Iya wá, ya *Almasiihu-ka», a ba ŋane á katafke á emnde bademme. ²¹ Ta ndavanuhe: «Ka *Ailiya werre na emtu?» A ŋute ge Yuhanna: «A'aa, ya Ailiya-ka.» «Ka nabi na ŋá aŋkwa cena elva-aara am wakita á Dadaamiya na emtu?» «Ya ŋane ka», a ba ŋane zlaŋbe. ²² «Ay ká ware kena? Ndaŋerndaha názena ni ŋá de mbedateru ge emnde na ta belanerbela na. Ate ka mu, ka ware?» ²³ A ŋwaterante ge Yuhanna, a ba ŋane: «Iya wá, ya edda una ndza a ndahanaa nabi Aisaya werre, a ba ŋane: Aŋkwa ura á bálá elva am kaamba, a ba edda-aara: Aŋkwa á sawa Yaakadada, tsatsawanaatsatse barama ba ndedde na.»

²⁴ Emnde na ta belateraa á deza Yuhanna ŋanna wá, emnde umele-aatare ta *Farisa-aha. ²⁵ Itare ta ndavanuhe ge Yuhanna, a ba itare tá elvan ge ŋane: «Labára ká magaterá baptisma ge emnde máki ka Almasiihu-ka, ka Ailiya-ka, ka nabi na á ndahaná wakita á Dadaamiya-ka?» ²⁶ A ŋwaterante ge Yuhanna, a ba ŋane: «Iya wá, yá magakurá baptisma á ba an yawe, amá aŋkwa ura á de sawa am iga-aaruwa, ba kina keni aŋkwa á ba am dágave á kure diyakurka ba kure, ŋane wá, ²⁷ ba ge slesadanse kimake am sera keni lyanefka dekiŋeki.»

²⁸ Una-aha ŋanna a magava am Baytaniya áte

iga a guwa á Urdun, tate na Yuhanna á magaterá baptisma ge emnde.

Yaisu egdza zhel kyawe á sadake á Dadaamiya

²⁹ Makuralla-aara, ma ba a puwete ice-aara Yuhanna áte Yaisu, anƙwa á duwa ádezeɗara wá, a ba ɗane: «Kwaye egdza zhel kyawe á sadake á Dadaamiya, á bezaná ɗane haypa á duniya baɗemme. ³⁰ Ba ɗane edda una ndza ya bakuraa elva-aara, a ba iya: Anƙwa á sawa ura am iga-aaruwa, amá á jiyuje ɗane an ɗgahire, aɗaba kwaye zlaɓe yarika ya keni ɗane anƙwa na wá, ba ɗane. ³¹ Ba iya keni ndza diyanka dawale ɗanna estuwa, mbate aɗaba ba ɗane una ya se magateraa baptisma an yawe ge emnde geni a diyareddiye emnde a *Iserayiila ba shagera.» ³² A ba Yuhanna zlaɓe ádaliye: «Ya nanna Shedekwe Cufedɗe á tsekwa á sawa am samaya ba seke takala wá, a se tsekwehe áte ɗane. ³³ Werre wá, ndza diyanka ganakini ɗane ura estuwa, amá ndza a biyánba Dadaamiya na a beli ge se magateraa baptisma an yawe ge emnde na, a ba ɗane: Watse ká nanna Shedekwe Cufedɗe á se tsekwanem am ire ge ura, ura ɗanna wá, ba ɗane una watse á magaterá baptisma ge emnde an Shedekwe Cufedɗe na. ³⁴ Ya nanna una ɗanna», a ba Yuhanna, «Aɗaba una ɗanna yá enndáhá ba párákke geni ba ɗane una *Egdza á Dadaamiya.»

Pukura-aha á Yaisu zuɗɗwe

³⁵ Gurgekse-aara keni ba nja-aara am tate ɗanna Yuhanna, tá anƙwa emnde buwa am pukura-aha-aara ázeɗara. ³⁶ A naa Yaisu anƙwa

á degáshe wá, «Kwaye egdza zhel kyawe á sadake á Dadaamiya!» á bina. ³⁷ Cenaráncena pukura-aha-aara buwa na elva ɲanna, ta naba tse, ta dába Yaisu. ³⁸ A eptsavete ge Yaisu wá, a naa ba tá dabaná am iga. A ndavateruhe: «Kwá kátá uwe kure?» Tá ɲwanante a ba itare: «Ká ɲjá áme ká Rabbi?» (amaana malum). ³⁹ A ɲwaterante ge Yaisu, a ba ɲane: «Sawmbare, nawanaana tate ɲanna.» Daaci ta duhe, ta de zharanaahe tate na á nja Yaisu átekwa ɲanna, ta zlansau váha ázeɲara. Duwa-aatare ɲanna á maga saa ufađe á ice a vaciya.

⁴⁰ Pukura-aha buwa na ta cenvaa seydire na a maganaa Yuhanna áte Yaisu, ta dába Yaisu na wá, palle-aatare Andere, egdza emmeɲara ge Simaun Piyer. ⁴¹ Am iga a tegava-aatare antara Yaisu wá, Andere ta de ja ire an egdza emmeɲara Simaun zuɲɲwe. Daaci a mbedfanuhe, a ba ɲane: «ɲere shaɲeránsha *Almasiihu vatena» (amaana: Edda una a eksesaa Dadaamiya). ⁴² Daaci a puwanse á deza Yaisu na. Daremda áza Yaisu, a ba Yaisu á elvan ge ɲane: «Ba ka Simaun egdza á Yuhanna na ka? Mazla-aara wá, zhera á ɲa Kaifas.» Amaana: Piyer. Piyer na wá, palaha.

Yaisu á dáhá tara Filip an Natanayail

⁴³ Makuralla-aara tsetse ire á Yaisu ge eptsá á dem kwára á Galili maa, de jarje ire antara Filip. «Sawa dábídaba», a ba ɲane á elvan ge ɲane. ⁴⁴ Filip, ɲane ura Baytisayda, ekse-aatare ba palle antara Andere ira Piyer. ⁴⁵ Duwa á Filip, ɲane keni ta de jaa ire antara Natanayail, a

mbedanuhe, a ba ɲane á elvan ge ɲane: «Ɔjere shaɲeránsha edda una Muusa a puwete elva-aara am *tawraitá, nabi-aha umele keni ta ndaha elva-aara na. Una ba Yaisu egdza á Yusufa, ura Nasarátu.» ⁴⁶ A ba Natanayail á elvan ge ɲane: «Duksa shagera estuwa ni á jesaare á kya Nasarátu Filip?» A ba Filip: «Sawa nanaana ba ka.»

⁴⁷ Am sarte na aɲkwa duwa Natanayail ádeza Yaisu, a ba Yaisu: «Náwa ura *Iserayiila jirire na ni baaka fida am ɲane dekidéki.» ⁴⁸ «Ka diyise áme?» a ba Natanayail á elvan ge ɲane. A ɲwanante ge Yaisu, a ba ɲane: «Ba lauktu á duwa Filip á de dákáfáhá am ekte á nabugda na keni, iya yá zhárá ba ka.» ⁴⁹ Daaci a ba Natanayail á elvan ge ɲane: «Malum, ekka wá, ka *Egdza á Dadaamiya, ka Slekse á *Iserayiila ba jire.» ⁵⁰ A ba Yaisu á elvan ge ɲane: «Ká fetare áte ya, adaba ya bakaa ya nákná am sarte na ká am ekte á nabugda na emtu? Duksa na á jauje ba ge una keni, sey watse ká nanna.» ⁵¹ A ba ɲane zlaɓe ádaliye á elvan ge ɲane: «Yá ndak ba jirire: watse kwá nánna degiya samaya an wacene ba waɲɲe, daaci malika-aha á Dadaamiya tá d'álá á dem samaya, tá tsekwa zlaɓe á setarge iya ya *Ura á emnde baɗemme.»

2

Muɲri á larusa am Kana

¹ Am háre ge keyire am iga a tse-aara, jerje muɲri á larusa am Kana am kwárá á Galili. Aɲkwa emmeɲara ge Yaisu am larusa ɲanna.

² Yaisu antara pukura-aha-aara keni daraterdáhá á dem larusa ñanna. ³ Daaci eksateraarektse mbazla maa, a ba Maari á elvan ge Yaisu: «Degiya baaka zlauzle mbazla-aatare.» ⁴ Amá a ñwanante ge Yaisu a ba ñane: «Emma ká kwarisá ka slera-aaruwa emtu? Iya zlafe samka sarte-aaruwa emtsaade.» ⁵ Amá duwa á Maari, a ba ñane á elvan ge emnde a tega duksa, «Ma a bakuraa uwe keni naba magaumágá.»

⁶ Ankwa jeba á gahe á yawe-aha umele am tate ñanna, Yahudiya-aha tá bara an ñane áte una á kwaratersá nadina-aatare. Gahe-aha ñanna wá, palle-aara á ekse yawe deydey hwámá ilyeŕe. ⁷ A ba Yaisu á elvan ge emnde a tega duksa: «Nawantenáhá gahe-aha na an yawe.» Ta naba nante yawe am gahe-aha na an we-aara. ⁸ Daaci a ba Yaisu á elvan ge itare: «Kina wá, kawvaaka cekwaanġudī, vawanteva ge male á muñri na.» Ta naba kevaáhe, ta danánhe. ⁹ Male á muñri ñanna a tapaa yawe na a nyev mbazla na, diyaaka tate na ni ta sanaa átekwa. Amá emnde a tega duksa wá, itare diyardiya adaba ta payema ba itare yawe ñanna á dem gahe-aha. Daaci male á muñri na a dante zhele á larusa, ¹⁰ a ba ñane á elvan ge ñane: «Emnde tá tegater mbazla na emtake jipu na emtsaade zuññwe ge emnde, má hyaterhya mbazla ge emnde lauktu tá payaterá una ektseváktsa emtakire-aara ni, ekka sem kina keni ka sheŕanve una emtake jipu na á ba am bere?»

¹¹ Kwaye ñane najipu á Yaisu zuññwe, a maganaa am Kana, am kwárá á Galili. A marese estuwa yaikkire-aara, pukura-aha ta fetarehe

áte ñane. ¹² Am iga a una ñanna maa, ñane, emmeñara, egdzar mama-aha-ñara, ira pukura-aha-aara, ta zláá á dem Kafarnahum. De hararaaháre cekwaanḡudi áhuwa.

Názena a maganaa Yaisu am mashidi

(Mat. 21:12-13; Mark. 11:15-17; Luka 19:45-46)

¹³ Herzhapteherzhe muñri á Yahudiya-aha na tá ðaháná an *Paska na maa, a naba tsetehe ge Yaisu, a dem Urusaliima ge mága muñri ñanna. ¹⁴ Daada-aara am Urusaliima wá, a dem *mashidi yaikke. Duwa-aara, a de bera emnde tá anḡwa válá sla-aha, kyawe-aha, antara emnde a válá takala, ira emnde a peteke, tá an tabel-aha-aatare á katafke. ¹⁵ Yaisu a naba kezlante záwá, a ganve ba seke kurpe, a ngyaterse antara dabba-aha-aatare na baðemme am mashidi na, a naba mbaðaa tabel-aha á emnde a peteke, a puwevhe ge shunḡu-aha-aatare ñanna á dem áhá. ¹⁶ A ba ñane á elvan ge emnde a vela takala keni «Jawanaaja áhuna! Labára kwá ganve bere á Edderwa bere á tsakala?» ¹⁷ Pukura-aha-aara tá zhára ba maga-aara na wá, ta naba yehete názu am wakita á Dadaamiya, anḡwa an puwa a ba ñane: «Dadaamiya-aaruwa, wayantewáyá bere á ña an ervaunḡe-aaruwa baðemme, yá taa njeka tsekadde ðekideki.»

¹⁸ Am iga a una ñanna maa, a ba male-aha á Yahudiya-aha, tá elvan ge ñane: «Ká marañerá najipu-ara kina lauktu ná dise átekwa geni a vaktaa ba Dadaamiya hákuma á mága una?» ¹⁹ A nwaterante ge Yaisu, a ba ñane: «Naba mbedawanaambedá kure mashidi na, yá

tsantetse zlaɓe ádaliye am háre keye.» ²⁰ A ba Yahudiya-aha tá elvan ge ɲane: «Yawe kul ufade ju unƙwahe tá nderá ba mashidi na náwa ɲane na ni, ká tsantetse ka am háre keye?»

²¹ Mbate ɲane a ndanaa áte mashidi-ka, ɲane a ndaha elva a emtsa-aara, antara tse-aara am fáyá. ²² Am sarte na tsetsa Yaisu am fáyá wá, saasa elva ɲanna á sem ire á pukura-aha-aara, ta fetarehe áte názena am wakita á Dadaamiya, antara elva-aha na ndza a ndahanaa ɲane baɗemme.

Ma ware keni Yaisu diyaadiya huɗe-aara

²³ Am haraare Yaisu am Urusaliima am muɲri á *Paska maa, kwakya najipu-aha na a maganaa ɲane, emnde keni kwakya fartarfe áte ɲane aɗaba najipu-aha ɲanna. ²⁴ Amá Yaisu wá, fetareka an itare, aɗaba ɲane diyaadiya názu am ervaunɗe-aatare baɗemme. ²⁵ Aɗaba ɲane wá, tá banná emndeka elva áte ura, diyaadiya ba ɲane názu am huɗe á emnde baɗemme.

3

Tara Yaisu an Nikaudaimus

¹ Ndza anƙwa ura *Farisa umele zhera-aara Nikaudaimus, palle á male-aha á Yahudiya-aha wá, ² a seza Yaisu an vayiya, a se ndava elva ázeɲara. «Malum», a ba ɲane á elvan ge Yaisu: «Diyarɗerdiya geni a belakaa Dadaamiya, aɗaba baaka edda una á dzegwándzegwa mága najipu-aha na ká anƙwa maganá ka na, máki baaka Dadaamiya antara ɲane.» ³ A ɲwanante ge Yaisu, a ba ɲane á elvan ge ɲane: «Yá ndak

ba jirire: Baaka ura á dem zlanna á Dadaamiya máki yairseka ge buwire.» ⁴ A ba Nikaudaimus á elvan ge ñane: «Tá yáná estara kena emgyegwe a zhele, á dzegwándzegwa dem huđe á emmenjara, lauktu tá eyya ádaliye emtu?» ⁵ A ba Yaisu á elvan ge ñane «Yá ndak ba jirire: Ma ware edda-aara keni á daaka á dem zlanna á Dadaamiya dfekideki má yairseka an yawe antara an Shedekwe Cudedđe. ⁶ Una tá yáná emnde am duniya na keni ba ge ire-aara. Tate na á yáná Shedekwe Cudedđe keni á yáná ba shedekwe. ⁷ Manjka najipu adaba ya bakaa sey tá yakurseye ge buwire. ⁸ Effeya wá, ma á dem tate-ara keni ba á vátá. Ká cenáncena mága-aara, amá wá, ma a tsetaa áme keni diyanjka, ma á de tse áme keni diyanjka. Edda una tá yáná an hákuma á Shedekwe Cudedđe keni ba estuwa.» ⁹ A ba Nikaudaimus á elvan ge ñane: «Á magava estara una ñanna?» ¹⁰ A ñwanante ge Yaisu: «Iyau ekka wá, ka malum á *Iserayiila-aha yaikke keni diyanjka una? ¹¹ Yá ndak ba jirire, ñere wá, ñá ndakur názena ni diyanjerdiya, antara názena ñá nanna, amá kwá ceneka elva á ñere. ¹² Máki yá bakurá elva áte kazlaña á duniya aley cenakurvaaka fakurtaareka áte ya, sakwa kazlaña á samaya emtu? ¹³ Ay degiya baaka edda una ndza a dem samaya ba palle keni. Cenaucena elva-aaruwa ya *Ura á emnde bademme na ya sawa am samaya.

¹⁴ «Yeheteyeha názena ndza a maganaa Muusa am kaamba werre: A magaa havale an verzhagane, a zlejelete áte zade, a kante á dem

zhegela. Iya *Ura á emnde bademme keni watse tá de zlenjeliyá ba estuwa. ¹⁵ Daaci ma a fetare ware áte ya keni á shansha shifa na á zleka na. ¹⁶ Adaba Dadaamiya wayatewáya duniya kwakya. Adaba una nanna a vante Egdza-aara palle ba nane. Ma a fetara ware áte Egdza nanna keni, á kefeka dekideki, á shansha shifa na á zleka na. ¹⁷ Dadaamiya belaaka Egdza-aara á sem duniya geni á se ngwada emnde, amá a belán geni tá nezlesenzle emnde áte erva an nane. ¹⁸ Edda una fetarfe áte nane wá, baaka shairiya áte nane. Amá edda una má fetareka áte nane wá, ba kina keni nánáña shairiya, adaba fetareka áte *Egdza á Dadaamiya palle ba nane. ¹⁹ Náwa názena ni watse emnde tá shá ngwada adaba nane: Samsa parakkire á sem duniya, amá emnde a duniya yarnaaya, itare ta hayaa ba tabedammire, adaba shagerka názena tá maganá itare. ²⁰ Ma ware una á maga duksa shagerka na, wayaaka an parakkire dekideki, a hayaa ba nja am tabedammire, geni a marseka parakkire shagerkire na á maganá nane na. ²¹ Amá edda una ni á maga duksa shagera wá, nane á kátá ba parakkire, geni a naránna emnde shagerire-aara antara geni a diyareddiya emnde fesarfire na á maganán ge Dadaamiya.»

Ngahire á Yaisu an názá á Yuhanna slemaga baptisma

²² Am iga a una nanna maa, a tsetehe ge Yaisu antara pukura-aha, ta dem tate umele á ba am kwará á Yahudiya nanna, hararaare jipu am tate nanna, ta magateraa baptisma ge emnde áhuwa.

²³ Yuhanna slemaga baptisma keni anƙwa á magaterá baptisma ge emnde am ekse á Aynun herzhe an Salim, aɗaba kwakya yawe am tate ɲanna. Emnde kwakya tá dezeńara, á magaterá baptisma. ²⁴ Aɗaba zlaɓe eksarvaaka Yuhanna á dem daŋgay am sarte ɲanna.

²⁵ Ay emnde umele am pukura-aha á Yuhanna, tá anƙwa gajawe antara ura Yahudiya umele arge naɗe á Yahudiya-aha ge bára, lauktu tá shá cuɗeɗɗire áza Dadaamiya. ²⁶ Duwa-aatare á deza Yuhanna, «Malum yaikke», a ba itare tá elvan ge ɲane, «Zhel na ndza á njá ázeɲa áte iga a guwa á Urdun, ndza ka baɲeraa elva-aara na, zlaɓe anƙwa emtu am ire á ɲa? Kwaye ɲane keni anƙwa á magaterá baptisma ge emnde, baɗemme á emnde tá kela á ba dezeńara.»

²⁷ A ba Yuhanna á elvan ge itare: «Baaka ura á shansha ba názara keni máki vanteka Dadaamiya. ²⁸ Náza-aaruwa wá, ba kure keni diyakurdiya. Aɗaba ya bakurnaa ba iya an we-aaruwa geni iya wá, ya Almasiihu-ka, amá ya sleɓela á Dadaamiya ge se tsatsanaa baráma ge *Almasiihu. ²⁹ Diyakurdiya zhele á larusa wá, edda á mukse ba ɲane. Náza á slákáte wá, ɲane ba á njá átevege ura-aara zhele á larusa, á higa jipu ge cena kwará á ura-aara máki á ndáhá elva. Ba duksa palle ge iya keni. Ya ba seke ura á zhele á larusa, kina ervaunɗe-aaruwa ba seke nama. ³⁰ Shagera ba á farfe ɲgahire-aara ge ɲane, á gulá náza-aaruwa.»

Edda una a sawa am samaya

³¹ Edda una a sawa am samaya wá, bademme á duksa á ba am erva-aara. Amá ura á duniya wá, ñane ba urimagwe, elva-aara keni á ndaha ba elva á duniya. Amá edda una a sawa am samaya wá, bademme á duksa á ba am erva-aara. ³² A ndáhá názena ni a nanaa ñane, antara názena ni a cenanaa ñane, amá baaka ura á cena elva-aara. ³³ Ma ware una a cenvaa elva-aara keni, edda-aara njantenja jirire á Dadaamiya. ³⁴ Slebela á Dadaamiya wá, á ndáhá ba elva á Dadaamiya, adaba Dadaamiya á vante Shedekwe-aara baaka zlakta-aara. ³⁵ Dadaamiya wá, wayetewáyá Egdza-aara, bademme á duksa a fanem am erva ba ge ñane. ³⁶ Ma a fetaare ware áte *Egdza á Dadaamiya keni shánsha shifa na á zleka na. Amá edda una fetarka áte ñane wá, á shanka shifa, á segasheka edda-aara am ervaunđe á Dadaamiya dekideki.

4

*Tara Yaisu an mukse á *Samariya*

¹ Cenarácena *Farisa-aha geni Yaisu anƙwa á magaterá baptisma ge emnde kwakya, ma emnde keni vayya ba emnde-aara arge emnde á Yuhanna. ² Cenácena Yaisu elva-aatare bademme. Ge jirire wá, Yaisu an ire-aara magannaaka baptisma ge ura, tá maganá ba pukura-aha-aara. ³ A cenaa ba elva á *Farisa-aha ñanna Yaisu wá, a naba tsete am kwará á Yahudiya ñanna bademme, ge eptsá á dem kwará á Galili. ⁴ Ge dem Galili ñanna maa, sey á degáshe am huđe á *Samariya praatte.

⁵ Daada am ekse umele tá dáhána an Sikar am kwará á Samariya maa, anƙwa fe ndza a vanta a Yakubu ge egdza-aara Yusufu áte iga a ekse ɲanna. ⁶ Anƙwa suwa ndza a yanaa Yakubu werre am fe ɲanna. Daaci a duhe ge Yaisu, a de njehe áte we á suwa ɲanna adaba kudfukkuɗe vuwa-aara ge zláá. Am sarte ɲanna keni hyephye vacitire.

⁷ Ay samsa mukse á emnde a Samariya a se ká yawe maa, «Viteva yawe yá shushe», a ba Yaisu á elvan ge ɲane. ⁸ Am sarte ɲanna zlarzálá pukura-aha-aara, ta de shekwa náza za am huɗe á ekse. ⁹ A ba mukse na á elvan ge ɲane: «Ká ura a Yahudiya ni, ká ndaviyu yawe ge iya ya mukse a Samariya? Yá vakteva ká essha?» (A ndaa una mukse na wá, adaba tá gyaaveka Yahudiya-aha antara Samariya-aha.) ¹⁰ A ba Yaisu á elvan ge ɲane: «Ba diyankire ka wá, ma andze diyakdiya duksa na ni á vaterta Dadaamiya ge emnde, antara edda una náwa á ndavaku yáwe á sha na wá, baira ma ká ndavanuwa ba ka, ma ká shánsha yawe na á fá shifa am ura na.»

¹¹ A ba mukse na á elvan ge ɲane: «Ká káná an uwe kwa eddaaye? Ganta á ɲa keni baaka, suwa sladɗe vayvaya, ká sháná estara yawe á shifa ɲanna ká ndaná ka na? ¹² Ekka jakuje ge eggyeɲere Yakubu na a yaner suwa na emtu? ɲane, egdzara-aara ira walde-aha-aara bademme ta shaa ba yawe á suwa na!» ¹³ A ba Yaisu á elvan ge ɲane: «Bademme á názena á shá yawe á suwa, ndera keni ba á wanwa zlaɓe adaliye. ¹⁴ Amá edda una a shu yawe na yá vanta ya wá, á wanka ndera mazla-aara. Adaba

yawe ɲanna yá vantá ya na á de nyev suwa am ɲane, suwa ɲanna á vante shifa na á zleka na ge edda-aara.» ¹⁵ A ba mukse na á elvan ge ɲane: «Viteva ka yawe ɲanna eddaaye, geni a wika ndera mazla-aara, yá shansha ire-aaruwa ge se ka yawe áhuna.»

¹⁶ A ba Yaisu á elvan ge ɲane: «De ɗantedfaha kwa zhele á ɲa, kwá sawa kerde.» ¹⁷ «Baaka zhele-aaruwa», a ba mukse na á elvan ge Yaisu. «Baaka zhele á ɲa a ba ka na wá, ndaksenda jirire», a ba Yaisu á elvan ge ɲane. ¹⁸ «Adaba zala-aha á ɲa miyenne ka gateraa ka wá, tá ilyebe, amá zhel na ká am mba-aara kina na zhele á ɲa ka. Baaka fida am elva á ɲa na.» ¹⁹ A ba mukse na: «Kina wá, diyandiya ganakini ka nabi eddaaye. ²⁰ Ká cenáncena emtu ndza ba werre keni eggye-aha á ɲere ta kezlan ugje ge Dadaamiya á ba áte wa na náwa ɲane na, amá á ba kure Yahudiya-aha sey Urusaliima palle una tate á kezlan ugje ge Dadaamiya.» ²¹ A ba Yaisu á elvan ge ɲane: «Náwa yá ndaaka elva emmaaye, eccena ba shagera: Ankwa á sawa sarte umele wá, tate á kezlan ugje ge Dadaamiya watse áte wa na ka palle, am Urusaliima ka palle. ²² Kure Samariya-aha wá, ma kwá kezlan ugje ge ware keni diyakurka. Amá ɲere Yahudiya-aha wá, diyaɲerdiya edda una ni ɲá kezlan ugje ɲere. Adaba slelya ura á jesaare á ba dagave á Yahudiya-aha. ²³ Amá ankwa á sawa sarte umele, ba kina keni samsa sarte ɲanna, emnde tá de kezlan ugje ge Dadaamiya na Dada ba ɲane na, an hákuma á Shedekwe Cufedɗe, tá

de kezlan ugje á ba an jirire. Adaba Dadaamiya wá, á kátá emnde na ni tá kezlan ugje áte una ñanna. ²⁴ Dadaamiya wá, Shedekwe, emnde na tá kezlan ugje keni a kezlarankezla an hákuma á Shedekwe Cudedde, a kezlarankezla á ba an jirire.»

²⁵ A ba mukse na á elvan ge ñane: «Diyandiya watse á sawa *Almasiihu, watse á se palañernaapálá ñane sera á duksa bademme.»

²⁶ A ba Yaisu á elvan ge ñane: «Ba iya Almasiihu ñanna yá ndaka elva na.»

²⁷ Am sarte ñanna, pukura-aha á Yaisu keni saremsa mazla-aara. Tá maga najipu-aara itare, Yaisu aṅkwa á nda elva antara mukse na. Amá baaka ura a ndaana elva ge mukse na, geni ká kátá uwe ázeṅara, baaka edda una a banán ge Yaisu geni a jakurma uwe antara mukse na.

²⁸ Daaci mukse na a naba belaa hwámá-aara áhuwa, a eptsehe á dem huđe á ekse, a ba ñane á elvan ge emnde: ²⁹ «Sawmbare emtsaade, nawanaana zhele umele náwa ñane áhuna, a balise názena ndza ya maganaa ya bademme, watse *Almasiihu ñara emtu estara?» ³⁰ Estuwa kelá á emnde á sawa am huđe á ekse, tá aṅkwa deza Yaisu.

³¹ Am sarte na ni eptsaptsa mukse na á de dafa emnde am huđe á ekse, a ba pukura-aha tá elvan ge Yaisu: «Sawa seke zuze egdza náza za malum!» ³² Amá a ñwaterante: «Aṅkwa náza zá-aaruwa, dafa na ni diyakurka kure na.» ³³ A ba pukura-aha am dágave-aatare «Watsa aṅkwa ura a sanaa náza za emtu?»

³⁴ A ba Yaisu á elvan ge itare: «Náza zá-aaruwa ɲanna wá, ba fansaare ge edda una a belibela na, antara mága slera na a fiyaara ɲane na baɗemme.» ³⁵ A ba ɲane á elvan ge itare zlaɓe ádaliye: «A ba palle á naraje-aha á kure: Zlaɓe a juwa tere ufaɗe lauktu tá ica hiya. Amá názena yá bakurná iya wá: Zharawanaazhárá emtsaafé fe ba shagera, duksa baɗemme naavene kyaɲɲe, herzhe icica-aara. ³⁶ Edda una á ica hiya wá, á ba aɲkwa mbera-aara, á jáhá hiya ɲanna á dem tate á shifa na á zleka na. Daaci tara sleja hiya antara edda una á icica tá de higa baɗemme. ³⁷ Aɲkwa naraje umele zlaɓe ádaliye, a ba ɲane: Á janá ura umele, icica keni á icaná ura umele. Naraje ɲanna jire. ³⁸ Ya ɓelákuraa á de hala duksa am fe na magakurka slera am huɗe-aara ɗekiɗeki, ta maganaa ba emnde umele, amá kwá tapaná kure emtakire á slera-aatare.»

³⁹ Kwakya emnde a *Samariya na tá am ekse ɲanna fartarfe áte Yaisu, aɗaba elva na a de baternaa mukse ɲanna a ba ɲane: «A ɓalise názana ndza ya maganaa ya baɗemme.» ⁴⁰ Aɗaba una ɲanna, am sarte na saremsa emnde a Samariya áseza Yaisu, ta enɲála geni a haraare ázetáre. A naba eksarhe ge Yaisu, a gaa hare buwa.

⁴¹ Emnde kwakya zlaɓe ádaliye fartarfe áte ɲane, aɗaba názu ta cenanaa am waazu-aara. ⁴² A ba itare tá elvan ge mukse na: «Kina wá, ɲá fetaare aɗaba elva á ɲa ka palle, ɲá fetaare áte ɲane aɗaba ɲa cenevaa á ba an hyema á ɲere

elva am mbuwe-aara. Diyanɗerdiya ba jirire geni slelya duniya ba ɗane.»

Yaisu mbanaambe egdza á ura umele

⁴³ Yaisu a magaa hare buwa am tate ɗanna maa, mazla-aara a naba tse, a zlalá á dem kwará á Galili. ⁴⁴ Adaba ba ɗane an ire-aara keni a bánba geni nabi á shanka ɗgáhire am eksa-aara ba ge ɗane. ⁴⁵ Amá ba daadá-aara am Galili wá, emnde a Galili ta lyiyanaa á ba an erva buwa, adaba itare keni ta duwa á de maga muɗri am Urusaliima, daaci naránna itare keni názena a maganaa Yaisu am muɗri ɗanna baɗemme.

⁴⁶ Daaci Yaisu a daliye zlaɓe ádaliye á dem Kána, ekse na ndza a ɗyanve yáwe, a ganve mbazla am hude-aara na. Ay aɗkwa ura male, a fanaa ɗgumna, á njá am Kafarnahum maa, lapika egdza-aara. ⁴⁷ Cenáncena ura male na ganakini saasa Yaisu á sa am Yahudiya, aɗkwa am Galili, a naba deɗɗara: «Tasle á ɗa ɗabidába á dem Kafarnáhum, ká de mbanaambe egdza-aaruwa, shifa a juwa ba cekwa am ɗane», a bina. ⁴⁸ A ba Yaisu á elvan ge ɗane: «Palle ura á fetaare áte ya am dagave á kure na baaka dekideki, máki nakuránka najipu-aha.» ⁴⁹ A ba zhel na: «Mi zlala kwa á dem mba-aaruwa Yaakadada, a zlauka shifa am egdzere!» ⁵⁰ «Ezzlalá á dá, baaka duksa áte egdza á ɗa», a ba Yaisu á elvan ge ɗane. ɗane a naba fetaarehe áte elva na a ndaana Yaisu na, a naba dá-aara.

⁵¹ ɗane keni aɗkwa á da wá, ta jaa ire antara walaafi-aha-aara, «Mbaambe egdzere ba lapiya

layye», a ba itare tá elvan ge ñane. ⁵² A nda-vateruhe: «A shánaa am sarte-ara ñgulmire?» A ba itare tá elvan ge ñane: «Deydey zura awaya wá, belanaabelá zlágzlági.» ⁵³ Amá eddarge egdzere wá, a naba diyeddiye geni egdzere a mbe á ba am sarte na a bannaá Yaisu ezzlálá á dá, baaka duksa áte egdze á ña na. Daaci ñane antara huđe á há-aara baďemme fartarfe áte Yaisu.

⁵⁴ Kwaya ñane buwire á najipu na a maganaa Yaisu am kwára á Galili, a maganaa am sarte na saasa á sa am Yahudiya.

5

Yaisu mbanaambe ura ñguryekwe

¹ Am iga á una ñanna maa, gyaregya muñri á nadina am Urusaliima, tá anƙwa duwa Yahudiya-aha. Yaisu keni a duhe. ² Urusaliima wá, an bela am dala baďemme an wakyiya-aha gergere. Anƙwa derve yaikke herzhe an wakyiya na tá dƙhána an wakyiya á kyawe-aha na. Ta jantaave ge derve ñanna an bere-aha ilyeƙe. Zhera á derve ñanna Baytijaata an elva á Ibraniƙkau-aha.

³ Daaci baďemme á ekte á bere-aha ñanna ba emnde na lapika vuwa-aatare, wulfe-aha, emnde a dere, antara ñguryekwe-aha. ((Tá ufa gejava á derve ñanna. ⁴ Adaba an wapaka, á tsekwa malika á Dadaamiya á sem derve ñanna, daaci baďemme á yáwe á gejava. Daaci am iga á gejava á yáwe ñanna, ma a tsekwemaa ware zuññwe keni á mbembe edda-aara ma á waná uwe keni.))

⁵ Anƙwa ura umele á ba am dágave-aatare ɲanna, yáwe kul keye ju tiise á ba áte lapikere. ⁶ Am sarte na damda Yaisu, á zhárá zhel ɲanna á zlava. Am diyaadiya ganakini haraare lapikere-aara, a naba ndaan elva: «Wayak-wáyá emtu ká mbembe ba lanɲe?», a ba ɲane, á elvan ge ɲane. ⁷ A ba zhel na á elvan ge ɲane: «Á eksitá ware-aaruwa kwa á dem derve am iga a gejawa á yáwe malum-aaruwa? Ba kelaa má yá wawa ge duwa, caare ba damda ura umele zunɲwe arge iya.» ⁸ A ba Yaisu á elvan ge ɲane: «Ettse, faɗantefáɗá buce á ɲa, ezzlálá á da.» ⁹ Kertenj a naba mbehe, a tsetehe, a faɗante buce-aara, anƙwa á zlálá ba uwe keni á maganka.

Amá vacite ɲanna wá, kwaskwe á puwansepuwe. ¹⁰ Aɗaba una ɲanna, a ba male-aha á Yahudiya-aha tá elvan ge zhel ɲanna: «Vatena kwaskwe á puwansepuwe, an piya am *tawraita ganakini ká sepa buce á ɲa vatena ge da.» ¹¹ A ba zhel na á elvan ge itare: «Iya a binaa ba edda una a mbiyaahe na ettse, faɗantefáɗá buce á ɲa, ezzlálá á dá.» ¹² Ta ndavanuhe, a ba itare tá elvan ge ɲane: «Ware ɲane edda una ni a bakaa faɗantefáɗá buce á ɲa, ezzlálá na?» ¹³ Zhel na a mbanaa Yaisu na keni, diyaaka edda una ni a mbanaa am lapikere ɲanna. Aɗaba a zlalá watsewatse Yaisu am tate ɲanna, a kuva kwakyire á emnde.

¹⁴ Shekwaashekwa maa, Yaisu a duhe ádeza dawale ɲanna am *mashidi yaikke. A ba ɲane á elvan ge ɲane: «Kina wá, mbákmbe. Manƙa haypa mazla-aara geni a shaƙka una jauje ge una

ɲanna.» ¹⁵ Mazla-aara a naba disehe geni ndza a tsantaa ɲane áte lapikere na, a de ba áza mala-aha á Yahudiya-aha, a ba ɲane á elvan ge itare: «Ndza a mbiyaa ba Yaisu am lapikere-aaruwa.» ¹⁶ Adaba una ɲanna, male-aha á Yahudiya-aha ta naba gwarhe ge Yaisu an elva, geni a magán ge uwe una an kwaskwe á puwansepuwe. ¹⁷ Amá a ba Yaisu á elvan ge itare: «Edderwa wá, ma vaatara keni á maga ba slera. Adaba una ɲanna, iya sey ba yá emmaga.»

¹⁸ Elva-aara ɲanna a de vaterte ba ɲgwádfáva zlaɓe ádaliye geni sey tá janaaja shifa-aara. Adaba a ba itare: «Faaka zherwe áte kwaskwe á puwansepuwe-ka palle, a bantsa ɲane, Dadaamiya Eddenjara, a ganve ire-aara kalkale an Dadaamiya.»

*Hákuma á *Ura á emnde bademme*

¹⁹ A ba Yaisu á elvan ge itare zlaɓe ádaliye: «Yá ndaakur ba jirire: Baaka názu yá maganá iya an ire-aaruwa ya Egdzere, sey ya naaná á ba áza Edderwa. Bademme á názena ni á maganá Dada, Egdzere keni á maga ba ɲane una ɲanna. ²⁰ Adaba Dada wayawáyá jipu an Egdza-aara. Anƙwa á kwaranse názena á maganá ɲane bademme. Duksa yaikke a jauje ba ge una keni watse á kwaransekwere. Á tsaame najipu na watse kwá maganá kure. ²¹ Ba seke una ni Edderwa anƙwa á tsatertetse emnde na ba seke tá an emtsa, anƙwa á vaterte shifa na wá, Egdza-aara keni ba estuwa, a naba vante shifa ge edda una á kataná ɲane. ²² Baaka edda una ni á de kyáná Edderwa shairiya-aara. Bademme á

shairiya a fanem am erva ge Egdza-aara. ²³ A magaa una geni emnde bademme a farfa zherwe áte Egdza-aara keni, ba seke una tá anƙwa fáná áte ɲane na. Edda una faaka zherwe áte Egdzere wá, faaka á ba áte Eddeɲara na a belanaa na ɲane na.

²⁴ «Yá ndaakur ba jirire: Ma ware una a cenvaa elva-aaruwa, a fetaarehe áte edda una a belibela na, edda-aara shánsha shifa na á zleka na. Baaka shairiya áte edda-aara ɗekidɗeki, ɲane dedde am emtsa, daada am tate á shifa na á zleka na. ²⁵ Yá ndaakur ba jirire: Anƙwa á sawa sarte umele, ba kina keni ba seke samsa. Am sarte ɲanna wá, emnde na ba seke tá an emtsa na watse tá cenáncena kwárá á *Egdza á Dadaamiya. Ma a cenanaa ware kwárá-aara keni á gevge an shifa. ²⁶ Ba seke una ni an hákuma Edderwa ge tsante ura, á gev an shifa na wá, a vante hákuma ge Egdza-aara keni, geni á tsante ura, á ganve an shifa. ²⁷ A vante hákuma á kyá shairiya ge Egdza-aara keni, aɗaba Egdza-aara ɲanna *Ura á emnde bademme. ²⁸ Magauka najipu á una ɲanna ɗekidɗeki. Aɗaba anƙwa á sawa sarte umele, ba emnde na tá an emtsa, tá am irekhye keni, watse tá cenáncena kwárá-aara, ²⁹ watse tá sesse. Emnde na ni ndza ta magaa shagerire na, watse tá tse ge shaa shifa na á zleka na. Amá emnde na ndza ta magaa shagerkire wá, itare watse tá tse ge dem zlaɗa.»

*Seyde-aha á Yaisu *Almasihu*

³⁰ A ba Yaisu zlaɓe ádaliye: «Iya an ire-aaruwa wá, ba uwe keni yá dzegwánka emmága-aara, sey má biyánba Dadaamiya. Daaci shairiya na

yá kyáná ya wá, shairiya a jirire. Adaba yá kyáná áte una yá kataná ya-ka, yá kyáná áte una á kataná edda-una a belibela. ³¹ Máki ya seyde á ire-aaruwa ba iya, tá dise estara kena emnde jirire-aaruwa? ³² Amá anƙwa ura umele sleseyde-aaruwa ɲane. Diyandiya seydire na á maganá ɲane áte ya jirire. ³³ Ndza kwa belaa emnde á deza Yuhanna, ɲane keni maganaamaga seydire áte edda una ni ɲane jirire na. ³⁴ Yá anƙwa sá elva á Yuhanna antara seydire-aara á sem ire á kure na wá, ba geni kwá shánsha sawari, kwá lyelya shifa á kure. Iya ya baaka an wedere á seydire na á maganá urimagwe áte ya. ³⁵ Yuhanna wá, ɲane ndza ba seke parakkire, ndza á mbe am dágave á kure, ndza kwa higa an ɲane am sarte cekwaangudí. ³⁶ Iya wá, anƙwa seydire yaikke áte ya, jauje ge una a maganaa Yuhanna. Slera na a beliyaa Edderwa ge ɲane, yá anƙwa maganá ya na wá, á maganá ba slera-aaruwa ɲanna seydire áte ya, geni ya slebela á Dadaamiya. ³⁷ Ba Edderwa ɲanna a belibela na keni maganaamaga seydire-aara áte ya, amá kure cenakuránka kwára-aara, nakuránka ɲane an ice á kure keni. ³⁸ Daaci ɲakurnaaka elva-aara am kure, adaba fakurtarka áte Egdza-aara na a belanaa ɲane. ³⁹ Kwá anƙwa ndá wakita á Dadaamiya, adaba anƙwa am ire á kure geni watse kwá shá shifa na á zleka na. Ay degiya wakita á Dadaamiya ɲanna á ndá ba elva-aaruwa. ⁴⁰ Aley kure wayakurka sezerwa ganakini kwá shánsha shifa ba jirire.

⁴¹ «Yá kátá yaikkireka ya áza emnde. ⁴² Amá

duksa palle wá, am ervaunđe á kure wá, wayakurka kure an Dadaamiya đekideki. ⁴³ Iya, ya sawa an elva á Edderwa, liyakurika đekideki, amá má samsa ura umele á ba an ire-aara wá, kwá ellyiya. ⁴⁴ Ma ware á kure keni á kátá ba gálá áza emnde, kwá paŋka ni á galákurá ba Dadaamiya palle. Ay una ni, kwá fetaare estara kena áte ya? ⁴⁵ Amá bawánka zlađe am ervaunđe á kure, geni watse yá de icakuraare sera áza Edderwa. Edda una watse á de icakuraare sera wá, Muusa na kwa fetaare kure an ŋane na. ⁴⁶ Amá ma andze fakurtarfe áte Muusa ba jirire wá, iya keni ma kwá fetarfe áte ya. Adaba názena a puwetaa Muusa na á ndá ba elva-aaruwa. ⁴⁷ Am fakurtareka áte názena a puwetaa ŋane, kwá fetaare estara kena áte elva na yá ndaná ya?»

6

*Yaisu a zateru náza zá ge zala debu ilyeđe
(Mat. 14:13-21; Mark. 6:30-44; Luka 9:10-17)*

¹ Am iga á una ŋanna maa, a tsetehe ge Yaisu, a zlađe a dete iga a guwa á Galili. Tibariyas keni tá đáhá ba háye na am guwa ŋanna. ² Emnde kwakya ta đabemhe á dem tate ŋanna, adaba naránna najipu-aha na a maganaa ŋane, a naba mbateraahé emnde na lapika vuwa-aatare. ³ Yaisu antara pukura-aha-aara ta đaletaa áte egdza wa, ta de njehe. ⁴ Muŋri á Yahudiya-aha na tá đaná an *Paska na keni herzhavteherzhe. ⁵ Yaisu a kante ice wá, á zhárá ba dikele á emnde tá aŋkwa dezeńara. A ba ŋane á elvan ge Filip: «Mí de sháná áme náza zá na á se

hyaterhye ge emnde na?» ⁶ A ndán ba ge cena názu am mbuwe á Filip ka wá, ñane diyaadiya názena ni watse á maganá ñane. ⁷ A ñwanante ge Filip, a ba ñane á elvan ge ñane: «Ma mi shekweve náza zá á gursa deremke keni á hyeteka dekideki áte emnde, máki má kátá ma ware-aatare keni a shánsha cekwa.»

⁸ A ba Andere egdza emmenjara ge Simaun Piyer, palle á pukura-aha-aara, a ba ñane á elvan ge ñane: ⁹ «Náwa anjka egdze umele áhuna an depaij ilyebe antara kelfe buwa, amá keni á magaterá uwe kena ge dikele á emnde na?»

¹⁰ Daaci a ba Yaisu á elvan ge pukura-aha-aara: «Bawateránba ge emnde a njarinja bademme áte másá.» Adaba kwakya másá am tate ñanna shagera ge nja átekwa. Tá naba njehe ge emnde, kezlakula á zála á maga debu ilyebe.

¹¹ Yaisu a lyevaa depaij na, a slafan we-aara ge Dadaamiya, daaci a kazlanve, a tegateraa ge emnde na tá njanja áte másá na. Arge kelfe keni a magán ba estuwa. Bademme á emnde zaruze á ba áte huđe-aatare. ¹² Hyaterhya ge emnde bademme maa, a ba Yaisu á elvan ge pukura-aha-aara: «Jawanmárje ge jugena-aara na bademme, a badzevka ba palle keni.»

¹³ Depaij ilyebe ñanna á hyaterhe ge emnde, baira jauje. Jarantejáhá jugena-aara, a netaa kenday sadafde kelaawa ju buwa.

¹⁴ Naránna emnde najipu na a maganaa Yaisu maa, a ba itare ba parakke: «Zhel na wá, ba jirire ba ñane nabi na ta bantsa watse á sawa á sem duniya na.» ¹⁵ Daaci diyeddiye Yaisu ganakini watse tá se fáná am sleksire á ba áte

laarire, a zlalehe zlaɓe ádaliye á dete ire á egdza wa, ba ɲane palle.

Yaisu á zlala an sera áte haya.

(Mat. 14:22-23; Mark. 6:45-52)

¹⁶ Eblyabelya vaciya maa, ta tsekwese ge pukura-aha-aara á sawa áte wa, ásete we á haye, ¹⁷ ta demhe am paare á yawe ge dem Kafarnáhum. Gevge vayiya, amá zlaɓe samka Yaisu emtsaade. ¹⁸ A tsetehe ge válale, baɗemme á haye á vaza. ¹⁹ Bakarvaabáká paare, á maga kilaumaiter ilyebe, ma uɲkwahe keni wá, tá zhárá ba Yaisu am iga-aatare, á zlála áte yawe, á dezetare tá am paare na. Daaci baɗemme-aatare ɲáteráɲa lyawa. ²⁰ Amá «A wakurka lyawa,» a ba Yaisu á elvan ge itare, «degiya ba iya.» ²¹ Ba itare keni varanteve baráma ge dem paare wá, tá zhárá ba tá áte we á guwa am tate na tá kátá demkwa itare na.

Emnde tá aɲkwa a tataya Yaisu

²² Mákuralla-aara maa, ba kelaa á emnde na ta geyaa áte iga a guwa na, ta fantau ge tataya Yaisu. Amá diyardiya ganakini ndza ɓaaka paare umele ɗekidɗeki am tate ɲanna, sey ba palle na ta zlalaa pukura-aha an ɲane na. Diyardiya geni damka Yaisu am paare ɲanna. ²³ Daaci ta naba demhe ge paare-aha umele á da am Tibairiyas á ba á dem tate ɲanna Yaakadada a slafanaa we ge Dadaamiya arge náza za, a hyaterhe an ɲane na. ²⁴ Emnde tá ezhara wá, ma Yaisu, ma pukura-aha-aara keni baɗemme ta ɓaaka. Ta naba demhe am paare-aha ɲanna, ta zlála á dem Kafarnahum, ta de zharanaa áhuwa.

Yaisu dafa na á fá shifa á jirire am ura

²⁵ Sawa-aatare wá, ta se bera Yaisu áte we á guwa. Ta ndavanuhe, a ba itare: «Ka sawa vaatara á sehuna Malum?» ²⁶ A ba Yaisu á elvan ge itare: «Yá ndaakur ba jirire: Kwá tatayiyá adaba ba náza za na ya zukurwa ya, kwa yanaa ba kure na. Cenakuránka ba názara keni am názena yá kátá bakurná ya an najipu-aaruwa. ²⁷ Shuṅṅulauka náza za na á shekwaaka bádza na, shuṅṅulaushuṅṅula una á badzeka dƙeɗeƙe, á vante shifa na á zleka na ge ura. Náza za ṅanna yá vakurta ba iya *Ura á emnde bademme, yá vakurte an hákuma na a vita Edderwa Dadaamiya.»

²⁸ Ta ndavanuhe, a ba itare tá elvan ge ṅane: «Ṇá shuṅṅula slera-ara una á kataná Dadaamiya na?» ²⁹ A ṅwaterante, a ba ṅane «Náwa slera na á kataná Dadaamiya ázekure: slera á kure wá, ba kwá fetare áte edda una a belanaa ṅane». ³⁰ A ba itare tá elvan ge ṅane: «Máki estuwa wá, maraṅeránmárá najipu na ni ṅá diyakse átekwa geni a belakaa Dadaamiya, ṅá nanaana an ice á ṅere, lauktu ṅá faktarfe. ³¹ Werre wá, eggye-aha á ṅere ndza zaruze mannu am kaamba, aṅkwa elva-aara am wakita á Dadaamiya, a ba ṅane: A vaterte náza za á sawa am samaya.» ³² A ba Yaisu á elvan ge itare: «Degiya ba mannu ṅanna keni ndza a vakurtaa Muusa ka, amá náwa Edderwa aṅkwa á vakurte náza za á jirire á sawa am samaya. ³³ Adaba náza za na ni á vakurta Dadaamiya na wá, ba ṅane edda una a sawa am samaya na. Á vanterta ba ṅane shifa ge emnde.»

³⁴ Daaci a ba itare tá elvan ge ñane: «Malum, vanjerteva náza za ñanna ba kelaazare.» ³⁵ A ba Yaisu á elvan ge itare: «Ba iya una ya ðafa na á vante shifa ge ura. Ma ware una a sezerwa, a fetarhe áte ya, á wanka waya antara ndera ðekideki. ³⁶ Ya ndakurndáha tsa, kure keni nakurina tsa, aley fakurtareka áte ya. ³⁷ Baðemme á emnde na ni a vitaa Edderwa na watse tá sáwá ázerwa. Ma a semaa ware á sezerwa keni yá banka ðekideki. ³⁸ Adaba sanká á sawa am samaya ge se maga názena yá kataná ya, amá názena á kataná edda una a belibela. ³⁹ Náwa názena ni á kataná edda una a belibela na: Emnde na ni a vitá ñane na, yá keðanaaka ba palle keni. Am halavuwa á duniya, yá tsatertetse baðemme am faya. ⁴⁰ Názena á kataná Edderwa wá, baðemme á emnde na ni ta naa ya Egdza-aara, ta fetarhe áte ya na, tá shansha shifa na á zleka na. Am halavuwa á duniya, yá tsatertetse am faya.»

⁴¹ Daaci farantaufe Yahudiya ge wesha elva áte Yaisu, adaba a bantsa ñane: «Ya náza za na a tsekwaa á sawa am samaya.» ⁴² Ta bantsa itare: «Abi Yaisu ñara ba ñane, ba ñane una egdza á Yusufa? Diyanerdiya tara eddeñara an emmeñara. Ay ni a ba ñane a sawa am samaya?» ⁴³ A ba Yaisu á elvan ge itare: «Weshauka elva am dágave á kure ba dey. ⁴⁴ Baaka ura á dzegwándzegwa ba ñane an ire-aara sezerwa, sey á tadáná Edderwa na a beliyaa á sem duniya na. Ma ware una a sezerwa keni sey yá tsantetse am faya am halavuwa á duniya. ⁴⁵ Ankwa puwatepuwa nabi-aha, a ba itare: Dadaamiya

watse á kwaratersekware ba ɲane elva-aara ge emnde. Daaci edda una máki faafa hyema am elva á Edderwa ɲanna, lyevaalya wá, ɲane á sáwá ásezerwa. ⁴⁶Una á banka ganakini anƙwa ura nanna Dadaamiya. Baaka ɗekidɗeki. Sey edda una a sawaa am samaya na. ɲane wá, nanna adaba Eddenjara.

⁴⁷«Yá ndaakur ba jirire: Ma a fetaare ware áte ya keni, shánsha shifa na á zleka na. ⁴⁸Ba iya una ya ɗafa na á fá shifa á jirire am ura na. ⁴⁹Eggye-aha á kure ta zu ɗafa na tá ɗaná an mannu na am kaamba, aley keni ba emtsaremtsá. ⁵⁰Amá náwa ɗafa na ni a tsekwa á sawa am samaya, ma a zuwaa ware ɗafa ɲanna keni a emtseka ɗekidɗeki. ⁵¹Ba iya una ya ɗafa ɲanna a tsekwa á sawa am samaya, á vante shifa ge ura na. Ma a zuwaa ware ɗafa ɲanna keni á shánsha shifa na á zleka na. ɗafa ɲanna yá vantá ya na wá, vuwa-aaruwa ba ge iya, yá vanterte ge emnde a duniya baɗemme, ganakini tá shánsha shifa an ɲane.»

⁵²Elva ɲanna a tsante elva yaikke am dágave á Yahudiya-aha. A ba itare am dágave-aatare: «Á vamite estara vuwa-aara geni mí ezza na?»

⁵³A ba Yaisu á elvan ge itare: «Yá ndaakur ba jirire: Máki zakuruka hyuwa á vuwa-aaruwa, shakuruka uzhe-aaruwa, iya *Ura á emnde baɗemme, kwa baaka an shifa am kure ɗekidɗeki. ⁵⁴Edda una á zá hyuwa á vuwa-aaruwa, á shá uzhe-aaruwa keni wá, shánsha shifa na á sleka na, am halavuwa á duniya yá tsantetse edda-aara am faya. ⁵⁵Adaba ba iya una ya ɗafa á jirire, uzhe-aaruwa keni náza shá á

jirire. ⁵⁶ Daaci ma ware una anƙwa á zá hyuwa á vuwa-aaruwa, anƙwa á shá uzhe-aaruwa, edda-aara ɲanna slenja á ba áte vuwa-aaruwa, iya keni yá anƙwa antara ɲane. ⁵⁷ Edderwa na a beliyaa ɲane na wá, edda á shifa ba ɲane, a njiyaa ba ɲane an shifa. Ba duksa palle ge edda una á zá hyuwa á vuwa-aaruwa keni, yá njanaanja edda-aara an shifa. ⁵⁸ Una ɲanna ɗafa á jirire na ni a tsekwaa á sawa am samaya; gergere antara una ndza ta zanaa egghe-aha á kure am kaamba werre. Itare sharánka shifa a jirire an ɲane. Amá ɗafa na yá teganá ya wá, ma a zuwaa ware keni á shá shifa na á zleka na an ɲane.»

⁵⁹ Elva-aha ɲanna a kwaratersaa Yaisu ge emnde am *mashidi á Yahudiya-aha am Kafar-nahum.

Elva na á fá shifa a jirire am ura

⁶⁰ Am iga a elva ɲanna maa, emnde kwakya á ba am emnde a ɗaba Yaisu, ta bántsa: Elva na degdege, á dzegwánka ura. ⁶¹ Náanna Yaisu ganakini tá wesha elva emnde a ɗaba ɲane am dagave-aatare, a ba ɲane á elvan ge itare: «Á wákurá ba elva-aaruwa na emtu am ervaunɗe? ⁶² Má watse nakuránna anƙwa á zlála *Ura á emnde bademme á dem tate na ndza a sawa átekwa mu, watse kwá bá uwe? ⁶³ Á vantá ba Shedekwe á Dadaamiya shifa ge ura. Slera á emndimagwaha an ndzedá-aatareka una. Daaci elva-aaruwa na yá anƙwa á bakurná ya na wá, Shedekwe ɲara ba ɲane, shifa ɲara ba ɲane. ⁶⁴ Amá tá anƙwa emnde na fartarka am

dágave á kure.» Adaba á ba am fantaufe keni Yaisu diyaadiya emnde na watse tá fetareka na, diyaadiya edda una watse á de vela nane keni.

⁶⁵ A farhe zlafe á daliye, a ba nane: «Ya bakurnaa adaba una nanna, a ba iya, baaka ura á dzegwándzegwa ba nane an ire-aara sezerwa, sey máki a tađanaa Edderwa.»

⁶⁶ A fantau á ba am sarte nanna, emnde a fetarfe kwakya ta yaa daba Yaisu, zlalarka antara nane mazla-aara. ⁶⁷ A ba Yaisu á elvan ge pukura-aha-aara kelaawa ju buwa: «Kure keni kwá kátá yiya emtu?» ⁶⁸ A nwanante ge Simaun Piyer, a ba nane á elvan ge nane: «Yaakadada, ná shá shifa na á zleka na á ba am elva á nã palle, ná de daba ware umele? ⁶⁹ Nere wá, fanjertarfe. Adaba diyanerdiya ganakini ba ka una ka sáwá áza Dadaamiya, ka cufedfe.»

⁷⁰ A ba Yaisu á elvan ge itare: «Kwa emnde kelaawa ju buwa na, ábi ya dzerakursaa ba iya? Ay ankwã ura palle am kure, nane ura á shaitaine.» ⁷¹ Una nanna wá, a ndanaa áte Yahuda egdza á Simaun Iskariyaut. Adaba Yahuda nanna, nane keni ba palle á pukura-aha á Yaisu kelaawa ju buwa tsa, amá a velanaa ba nane Yaisu.

7

Egdzar mama-aha-nãra ge Yaisu fartareka áte nane

¹ Am iga á una nanna maa, Yaisu ankwã á já daba á ba am kwára á Galili, wayaaka de

nja am Yahudiya mazla-aara, adaba Yahudiya-aha tá anƙwa tsagwada ba ɲane ge ja ba shifa-aara. ² Herzhapteherzhe muɲri á Yahudiya-aha na tá dahaná an muɲri á *bere á kacakaca maa, ³ a ba egdzar mama-aha-ɲara tá elvan ge ɲane: «Yánya dágave na mazla-aara, tsetse ezzlálá á dem Yahudiya, a de naránna emnde á ɲa na tá áhuwa keni slera á ɲa. ⁴ Adaba edda una ni á kátá emnde bademme tá diyeddiye ɲane wá, á shebeka ire-aara. Ábi ká maga najipu-aha á ba ka? Shagera ba ká de maganaamaga una ɲanna á katafke á nalga á emnde wá, lauktu tá diyaksediye.» ⁵ Ba egdzar mama-aha-ɲara keni fartareka áte ɲane dƙideki.

⁶ A ba Yaisu á elvan ge itare: «Náza á kure wá, ma sarte-ara keni bademme ba shagera. Iya wá, yá duka á dem muɲri ɲanna, adaba zlaɓe samka sarte-aaruwa emtsaade. ⁷ Kure wá, emnde a duniya tá dzegwánka fákurá áte kelaadire. Amá iya wá, wayarika emnde a duniya, adaba yá mára shagerkire á slera-aatare á segashe. ⁸ Ekkure wá, daumbare á dem muɲri. Amá iya wá, yá duka adaba zlaɓe samka sarte-aaruwa emtsaade.» ⁹ A ndaterse una ɲanna, a njehe am kwára á Galili, ɲane zlalaaka.

*Yaisu am muɲri á *bere-aha á kacakaca*

¹⁰ Zlarzlálá egdzar mama-aha-ɲara á de zá muɲri ɲanna maa, shebanve ire-aara atuge ice-aatare ɲane keni a duhe á dem muɲri ɲanna, amá wá, marateranka ire-aara ge emnde. ¹¹ Male-aha á Yahudiya-aha tá anƙwa tataya ba Yaisu am muɲri ɲanna, tá anƙwa enndáva am

dágave á emnde: «Kwa naaná áme Yaisu?»
¹² Daaci bademme á emnde am muḡri ḡanna, tá ndáhá ba elva á Yaisu am dágave-aatare an gá kwárá. A ba emnde umele: «Yaisu ḡanna wá, ura maggwe.» A ba emnde umele: «Zhel ḡanna slekedá emnde.»¹³ Amá bademme á una ḡanna tá ndaaná á ba an ila, adaba tá kuva a cenaráterka male-aha á Yahudiya-aha.

¹⁴ Amá am dagave á muḡri wá, tá zhárá ba dámda Yaisu á dem *mashidi yaikke am Urusaliima, anḡwa á ndater elva ge emnde.¹⁵ Tá maga ba najipu-aara Yahudiya-aha. Ta bántsa itare: «Zhel na mu a shanaa áme ḡane diya estuwa na, wallá a ndaase laya á malumireka, uweka?»

¹⁶ A ba Yaisu á elvan ge itare: «Elva na yá tsakaná ya na wá, yá ndaaná ya an ire-aaruka, elva-aha ḡanna á sáwá áza Dadaamiya na a belibela na.¹⁷ Edda una ni á kátá mága názena á kataná Dadaamiya wá, á naba diyeddiye elva-aaruwa na, tara a sawa áza Dadaamiya, an tara yá ndaaná ba iya an ndzedá-aaruwa keni.¹⁸ Edda una ni á ndáhá ba elva á ire-aara, á kataná yaikkire ge ire-aara. Amá edda una á kataná yaikkire ge edda una a belanaa ḡane wá, slejirire ba ḡane, baaka zlerma am ḡane dekideki.¹⁹ Sakuránka Muusa *tawraitá emtu? Ay ábi ba palle á kure keni baaka edda una dábátedaba shairiya-aha na am huḡe-aara. Ya gu uwe kena kwá kátá jija na?»

²⁰ A ba emnde na tá am jáháva, tá elvan ge Yaisu: «Ká an shaitaine emtu? Ware ḡane á kátá jagja na?»

21 A ba Yaisu á elvan ge itare: «Ya magaa ba slera palle an kwaskwe á puwansepuwe, amá bademme á kure kwá maga ba najipu-aara. 22 A ba Muusa am *tawraitá wá: Kwá belá egdzere am shedekwe am hare ge tiisire. Ge jirire wá, a fantauwa Muusa ka, ta fantau am eggye-aha á kure werre. Adaba elva á Muusa nanna wá, kwá ankwá belá egdzere am shedekwe ma an kwaskwe á puwansepuwe keni. 23 Má kwá ankwá maga una nanna an kwaskwe á puwansepuwe geni a badzevka tawraitá á Muusa, sakwa ura lapika vuwa-aara emtu? Labára kwá ica ervaunde áte ya geni labára ya mbá ura an kwaskwe á puwansepuwe, ura lapika vuwa-aara tsa? 24 Yawánya mága jeba una. Zharauka kure názena áte iga na, amá magaumága jirire.»

*Watse ba Yaisu una *Almasiihu na emtu?*

25 A ba emnde a Urusaliima: «Edda una tá tatayán ge ja ba shifa-aara na nane ka una? 26 Ankwá á ndá elva-aara ba parakke mazla-aara, baaka ura á piyantepiya. Watse diyared-diye male-aha á miya ganakini ba nane una *Almasiihu ka? 27 Amá keni estuweka. Má watse samsa Almasiihu wá, watse baaka ura á diyeddiye tate na a sawa átekwa. Amá náza á zhel na diyamidiya bademme tate na ni á sawa nane átekwa.»

28 Am sarte nanna maa, Yaisu ankwá á ndater elva ge emnde am *mashidi yaikke. A kante kwará, a ba nane á elvan ge itare: «Kina diyakuridiya emtu ba jirire? Diyakuridiya emtu tate na ya sawa átekwa? Iya wá, sanká ba

ya an ire-aaruwa, anƙwa edda una a belibela, diyakurka ba kure. Edda-aara ɗanna ura jirire seke ɗane baaka. ²⁹ Iya wá, diyandiya edda-aara, adaba ya sawa ázeɗara, a beliyaa ba ɗane.» ³⁰ Tá kátá ekseksa, amá baaka ura dzegwándzegwa fanve erva, adaba zlaɓe samka sarte-aara. ³¹ Mbate kwakya emnde na fartarefe áte ɗane am jáháva ɗanna. Ta bantsa itare: «Una ni ta bantsa watse á sawa *Almasiihu umele, á se maga najipu-aha na á jauje ge náza á zhel na zlaɓe adaliye?»

*Kwakwane-aha á *Farisa-aha antara male-aha á *liman-aha tá de eksa Yaisu*

³² Cenaráncena *Farisa-aha elva na tá anƙwa ndaaná emnde áte Yaisu an ila maa, ta naba magaa sawari antara male-aha á *liman-aha, daaci ta naba puwaa emnde a ufa mashidi á de eksa Yaisu na. ³³ Náanna Yaisu estuwa, a ba ɗane á elvan ge emnde: «Iya wá, yá haraaka kwakya ázekure mazla-aara, yá eptsa ádeza edda una a belibela na. ³⁴ Watse kwá tatayitátaya, amá watse kwá shika, adaba kwá taa daaka á dem tate na yá detekwa ya.»

³⁵ A ba Yahudiya-aha am dágave-aatare: «Watse á deme kena ɗane ni, miya mi taa daaka na? Watse á zlalá ádeza Yahudiya-aha á miya na zlararzlálá á dem dágave á Yunaniƙau-aha na, ge magateraa waazu ge Yunaniƙau-aha ka? ³⁶ Elva na a bantsa ɗane ni, watse kwá tatayitátaya, amá watse kwá shika, adaba kwá taa daaka á dem tate na yá detekwa ya, a ba ɗane na mu, á kátá ba uwe ɗane?»

Haye na á vante shifa ge ura

³⁷ Daaci kwaskwe na ni á zle muɗri ɗanna átekwa na wá, jauje ge hare-aha umele baɗemme am muɗri ɗanna. Vacite ɗanna maa, a tsetehe ge Yaisu, a tsaahé am dágave á emnde, a kante kwárá ba shagera, a ba ɗane á elvan ge emnde: «Ma á wáná ndera ge ware keni a se shushe ázerwa. ³⁸ Ma a fetaara ware áte ya keni, a jerje háye am edda-aara, háye na ni á vante shifa ge ura á degeza am edda-aara. Una názu a ndaana wakita á Dadaamiya.» ³⁹ Yaisu á ndá elva a Shedekwe Cufedde na watse tá sháná emnde a fetarfe. Am sarte ɗanna zlaɓe sharánka Shedekwe Cufedde emtsaade, aɗaba zlaɓe demka Yaisu am yaikkire-aara.

Bademme an tega ye á emnde áte Yaisu

⁴⁰ Am sarte na cenarvaacena emnde a jáháva elva-aara ɗanna maa, a ba emnde umele-aatare: «Zhel na, ba jirire ba ɗane nabi na ta baa watse á sawa na.» ⁴¹ A ba emnde umele: «*Almasiihu na ba ɗane.» A ba emnde umele zlaɓe adaliye: «Almasiihu na tá enndá na á jesare am Galili ka. ⁴² Aɗaba a ba wakita á Dadaamiya wá, Almasiihu á de jesare á ba am dágave á emnde a jeba á *Dawuda, á jesare am Baytilama ekse na ndza á njá amkwa Dawuda ɗanna.» ⁴³ Baɗemme á ye á emnde am jáháva gevge gergere am elva a Yaisu ɗanna. ⁴⁴ Emnde umele am dágave-aatare tá kátá eksa Yaisu, amá baaka ura dzegwándzegwa fanve erva.

Male-aha á Yahudiya-aha fartarka áte Yaisu

⁴⁵ Daaci eptsaraapetsa kwakwane-aha á *Farisa-aha, antara male-aha á *liman-aha na ba estuwa á dezetare. Ta de ndavateruhe ge emnde na, a ba itare tá elvan ge itare: «Labára sakuránka Yaisu na?» ⁴⁶ Tá nwaterante ge emnde na, a ba itare: «Kay! Zhel nanna ba vaci palle keni cenajeránka ura á ndáhá elva seke nane.» ⁴⁷ A ba Farisa-aha tá elvan ge itare: «Kure keni watse badakurubade zhel na ka?» ⁴⁸ Kwa nanna fartarfe male-aha, antara Farisa-aha á ntere áte nane emtu? ⁴⁹ Ábi sey tá fetaara ba ngudí-aha áte nane, emnde na diyarka *tawraita dekideki, tá an nyainye áza Dadaamiya na.»

⁵⁰ Amá ankwa Nikaudaimus na ndza a deza Yaisu an vayiya na am dagave-aatare, nane keni ba palle á Farisa-aha na tá áhuwa nanna, a ba nane á elvan ge itare: ⁵¹ «Ay degiya am tawraita á miya wá, mi taa ngudeka ura ba estuwa, sey máki cenamivaacena elva am mbuwe-aara antara názena a guwaa nane.» ⁵² A ba itare tá elvan ge Nikaudaimus: «Ekka keni ka ura á Galili emtu a gá? Eppákyá názu am huđe á wakita má watse ká shánsha ba palle keni nabi na a jesaare am Galili!»

((⁵³ Am iga á una nanna maa, ma ware keni a eksaa ba baráma de mba-aara.

8

Mukse na ta ekseva am gwardzire

¹ Yaisu wá, a dete ire á Wa Anyaranyara. ² Ba enlywa-waabere wá, a tsekweise, a eptsá á ba dem *mashidi yaikke suuwe, a de njehe, ta duhe

ge emnde ádezenjara, a fantau ge vaterte sera á elva. ³ Daaci malum-aha á *tawraita antara *Farisa-aha ta naba sanaa mukse ta ekseva am gwardzire, ta tsa mukse na á katafke á emnde bademme. ⁴ Daaci ta ndavanu elva ge Yaisu: «Malum,» a ba itare, tá elvan ge njane: «Náwa mukse na wá, nj eksevaa am gwardzire. ⁵ Názu a banjerna Muusa am *tawraita wá, mukse na á maga jeba una wá, ba tá ja shifa-aara an nákwá. Ekka mu ázara á ba elva á nj?» ⁶ Ta banaa una ba geni tá tsagwadfaná an njane, geni tá shánsha elva na an dzálá am mbuwe-aara. Amá a gaavehe ge Yaisu, anjwa á puwa áte haha an gulanda-aara. ⁷ Am itare yaránka ndáva na, á kante ire Yaisu, a ba njane á elvan ge itare: «Máki anjwa edda una ndza maganaaka haypa defekideki am kure wá, a fantaufe edda-aara zunjwe ge dzega mukse na an nákwá.» ⁸ A ndaase una njanna, a gaavehe zlafe adaliye, anjwa á puwa áte haha an gulanda-aara. ⁹ Ba ta cenaa elva njanna wá, ta fantau ge zlálá an palpale, ta fantuwa male zunjwe, a jauwa ba mukse na palle á tse á katafke á Yaisu. ¹⁰ A kante ire Yaisu, a ba njane á elvan ge mukse njanna: «Tá áme emnde na? Baaka edda una dzegwándzegwa ngudaknguda emtu?» ¹¹ A njwanante ge mukse na, a ba njane: «Baaka degiya malum.» A ba Yaisu á elvan ge njane: «Iya keni yá ngudanja. Ezzlálá, amá dalika á maga haypa.»))

Yaisu wá, parakkire ge duniya

¹² A ba Yaisu zlaɓe ádalíye á elvan ge emnde: «Ba iya una ya parakkire ge duniya. Ma a ɗabiyaa ware keni á shánsha parakkire na á vante shifa ge ura na, edda-aara á zlaɓe am tabedammire mazla-aara.»

¹³ A ba *Farisa-aha tá elvan ge ɗane: «Ká anƙwa á maganá ba ka seyɗire áte ire á ɗa na wá, elva á ɗa ɗanna jirireka deƙideƙi.»

¹⁴ A ba Yaisu á elvan ge itare: «Ma yá maganá ba ya seyɗire áte ire-aaruwa keni, elva-aaruwa jirire. Adaba diyandiya tate na ya sawa átekwa, diyandiya tate na yá zláá ádetekwa. Amá kure diyakurka ma tate na ni ya sawa átekwa, ma tate na yá zláá ádetekwa keni. ¹⁵ Kure kwá naba icanve elva áte ura, áte una kwá kataná kure emndimagwaha, amá iya yá ɗuɗeƙa ura deƙideƙi. ¹⁶ Ma ya icanve elva áte ura keni, yá maganá á ba an jirire, adaba ganevka an ire-aaruwa am elva ɗanna, amá anƙwa Edderwa na a belibela na antara ya. ¹⁷ Anƙwa an puwa am *tawraitá á kure, a ba ɗane: Máki seyde-aha buwa ta ndaase ba elva palle wá, elva-aatare jirire. ¹⁸ Náwa yá anƙwa maga seyɗire áte ire-aaruwa. Edderwa na a belibela na keni anƙwa á maga seyɗire áte ya.»

¹⁹ A ba itare tá elvan ge Yaisu «Áma eddeɗa ɗanna?» A ba Yaisu á elvan ge itare: «Ba iya keni diyakurika sakwa Edderwa emtu? Ma andze diyakuridiya wá, ma kwá naba diyeddiye Edderwa keni.»

²⁰ Kwaye ɗane elva na Yaisu a ndater ge emnde am *mashidi yaikke, am tate na tá fá sadake á nasherire átekwa na. Baaka ura a piyante

elva-aara dekideki adaba zlafe samka sarte-aara emtsaade.

Kwá taa daaka á dem tate na yá detekwa na

²¹ Daaci a ba Yaisu á elvan ge itare zlafe adaliye: «Iya wá, yá zlalá, watse kwá tatay-itátaya, amá watse kwá shika. Watse kwá emtsa á ba am haypa-aha á kure. Kwá dzegwánka dem tate na yá detekwa ya na.»

²² A ba Yahudiya-aha am dágave-aatare: «Watse á de já ire-aara ka? Adaba a ba nane, kwá taa daaka á dem tate na yá detekwa.» ²³ A ba Yaisu á elvan ge itare: «Kure kwa jesaare á ba am duniya na, amá iya wá, ya sawa á sa am samaya. Kure kwa ba emnde a duniya na, amá iya wá, ya ura á duniya-ka. ²⁴ Ya bakurnaa adaba una nanna watse kwá emtsemtsa á ba am haypa-aha á kure. Adaba ba jirire watse kwá emtsa á ba am haypa-aha kure máki fakurtaareka ganakini ba iya una Iya.»

²⁵ A ba itare tá elvan ge nane: «Ka ware?» A nwaterante, a ba nane: «Ya ba edda una kwaye am fantafe ya ndaakur ba nane na. ²⁶ Yá an elva kwakya ge ndanaa áte kure, ba jirire kwá taa njezleka am elva nanna. Amá bademme ba jirire. Adaba yá ndaakur ba názena ya cenanaa áza edda una a belibela na.»

²⁷ Cenaranka dekideki geni á ndater elva á Eddenara. ²⁸ Daaci a ba Yaisu á elvan ge itare: «Vacite na ni kakuranteka *Ura á emnde bademme wá, kwá de dise ba vacite nanna, ganakini iya wá, ya ba Iya. Kwá de diyeddiye geni názena yá maganá ya bademme na wá, ba iya an ire-aaruwa ka. Ma yá ndáhá uwe keni,

yá ndá ba názena a kwarisaa Edderwa. ²⁹ Edda una a belibela na anƙwa antara ya, á yika ya palle deƙideƙi, adaba ma vaatara keni yá magá ba názena á kataná ɲane.»

³⁰ Ba Yaisu a ndaase una ɲanna wá, emnde kwakya fartarfe áte ɲane.

Emnde a mága haypa ta náve-aha á haypa

³¹ Daaci a ba Yaisu á elvan ge Yahudiya-aha na fartarfe áte ɲane: «Máki tsakuraatse á ba áte elva-aaruwa wá, kwa emnde-aaruwa ba jirire, ³² kure kwá diyeddiye jirire, jirire á kure á palakuraapálá. Kwá kwaraná ba kure ire á kure.» ³³ A ba itare tá elvan ge Yaisu: «Ázara a ba ka? Ɗere ɲa eggye-aha á Ibrahimia miyenne, ba vaci palle keni danɲeremka am erva á ura ni, watse kwá kwaraná ba kure ire á kure, á ba ka?»

³⁴ A ba Yaisu á elvan ge itare: «Yá ndaakur ba jirire: Ma ware una á magá ba haypa na, edda-aara náve á haypa. ³⁵ Náve wá, ma estara keni á gevka ura á huɗe á há deƙideƙi. Amá egdzere wá, ma vaatara keni ba ura á huɗe á há ɲanna. ³⁶ Daaci máki a palakuraa *Egdza á Dadaamiya am navire á kure wá, shakuránsha ire á kure ba jirire. ³⁷ Diyandiya degiya ganakini kwa eggye-aha á Ibrahimia. Amá labára kena kwá lyiyeka elva-aaruwa, kwá anƙwa á tataya ja shifa-aaruwa na? ³⁸ Yá ndá ba názena ya naaná áza Edderwa, kure keni kwá magá ba názena a bakurnaa eddekure.»

³⁹ A ba itare, tá elvan ge Yaisu: «Eddenɲere ba Ibrahimia ge ɲere.» A ba Yaisu á elvan ge itare: «Ma andze kwa egdzara á Ibrahimia ba jirire wá,

ma kwá maga ba názena ndza a maganaa ɲane. ⁴⁰ Amá náwa yá aɲkwa ndaakur ba jirire názena ya cenanaa ya áza Dadaamiya, aley kure kwá tataya ba já shifa-aaruwa. Ibrahim wá, ɲane magaaka una dekideki. ⁴¹ Kure kwá maga ba slera á eddekure.» A ba itare tá elvan ge ɲane: «Ŋere ɲa masagwa-aha ka dekideki, Eddeɲere ba Dadaamiya palle.»

⁴² A ba Yaisu á elvan ge itare: «Ma andze ni kwa egdzara á Dadaamiya ba jirire wá, ma andze kwá wayiwáyá. Adaba iya ya sawa ázeɲara ge sezekure na. Sanka ba ya an ire-aaruwa, a beliyaa ba ɲane, yá njá á ba áte ɲane áhuna na. ⁴³ Labára ɲane á duka elva-aaruwa á dem ire á kure dekideki? Á duka á dem ire á kure adaba kwá dzegwánka cena elva-aaruwa. ⁴⁴ Kure wá, eddekure ba Shaitaine. Kwá kátá maga názena á kataná eddekure. Adaba ɲane sleceba emnde kwaye am fakta, baaka jirire-aara dekideki, adaba baaka jirire am ɲane. Ndáhá fida wá, duksa-aara ge ɲane, adaba slera-aara ba fida, ɲane male á fida. ⁴⁵ Amá iya wá, yá ndáhá ba jirire. Adaba una ɲanna wayakurika. ⁴⁶ Emtu ware edda-aara am kure á sansese haypa-aaruwa parakke? Ay má yá ndá ba jirire bademme, labára kwá fetarka áte ya? ⁴⁷ Ura á Dadaamiya wá, á cená elva á Dadaamiya. Amá kure kwa emnde á Dadaamiya-ka. Adaba una ɲanna kwá feka hyema áte elva-aaruwa.»

Kwaye zlaɓe yareka Ibrahim aɲkwa Yaisu

⁴⁸ A ba Yahudiya-aha tá elvan ge Yaisu: «Ndaɲeraɲka emtu ganakini ka wá, ka ura

*Samariya? Ndza ndaɲeraɲka emtu ganakini ká an jini am ire?» ⁴⁹ A ba Yaisu á elvan ge itare: «Yá an shaitaine ka ɔekidɔeki, yá gálá ba Edderwa, amá kure kwá aɲkwa epsawipsawa. ⁵⁰ Iya wá, ndanka ya ganakini a galarigálá emnde. Amá aɲkwa edda una a wayiyantaa ɲane ganakini a galarigálá emnde. Daaci watse á ndaaná ba ɲane elva á kure. ⁵¹ Yá ndaakur ba jirire: Ma ware una a magaa fesarefire am elva-aaruwa, ɲane á emtseka ɔekidɔeki.»

⁵² A ba Yahudiya-aha tá elvan ge ɲane: «Kina wá, diyaɲerdiya mazla-aara geni ba jirire ká an jini am ire. Ibrahimia emtsametsa, nabi-aha umele keni matsarmatsa, ekka ni má ura á maga fesarefire am elva á ɲa, á emtseka, á ba ka? ⁵³ Eggyemiya Ibrahimia an ire-aara maa, emtsametsa, jakuje ge ɲane emtu? Nabi-aha keni emtsaremetsa, ka mu ká zhára ire á ɲa ka ware?»

⁵⁴ A ba Yaisu á elvan ge itare: «Máki yá galaná ba iya ire-aaruwa wá, yaikkire-aaruwa hyepka duksa ɔekidɔeki. Iya á galiya ba Edderwa. Ba ɲane edda una kwa bantsa kure Dadaamiya na.

⁵⁵ Amá diyakurka ɲane ɲanna ɔekidɔeki. Iya wá, diyandiya. Ma ya bánba diyanka wá, ya slefida seke kure. Diyandiya ba parakke, yá aɲkwa á fansarefe am elva na á ndaaná ɲane.

⁵⁶ Dadaamiya ndza a banánba ge eggyekure Ibrahimia ganakini watse á hyemhye am sarte-aaruwa, a higa jipu arge elva ɲanna. Am sarte na marannaamará Dadaamiya, ervaunɔe-aara ndza ba seke nama.»

⁵⁷ A ba Yahudiya-aha tá elvan ge ɲane: «Ba yáwe kul ilyebe keni ká hyefka ni, ka náanna

Ibrahima, a ba ka?» ⁵⁸ «Yá ndaakur ba jirire,» a ba Yaisu á elvan ge itare: «Kwaye zlaɓe yareka Ibrahima keni yá aɲkwa ya.» ⁵⁹ Ta naba halem nákwá am erva tá kátá eddzága maa, a naba sheɓevhe ge Yaisu, a sesehe am mashidi ɲanna.

9

Yaisu mbanaambe ura wulfe ta yán ba estuwa

¹ Daaci aɲkwa á degashe Yaisu am tate umele wá, a naa ura wulfe ta yán ba estuwa. ² Ta ndavanuhe ge pukura-aha, a ba itare tá elvan ge ɲane: «Malum, ta yanaa aɗaba haypa á ware zhel na wulfe? Haypa á tara eddeɲara an emmeɲara emtu? Emtu haypa-aara ba ge ɲane he?» ³ A ɲwaterante ge Yaisu, a ba ɲane á elvan ge itare: «Ta yese wulfe aɗaba haypa-aara ka, tara eddeɲara an emmeɲara keni haypa-aatare ka. Una a gev ba geni a naránna emnde slera yaikke na á de maganá Dadaamiya áte ɲane. ⁴ Am zlaɓe aɲkwa tsawe vaciya wá, magaumimága slera á edda una a ɓelibela na. Aɗaba aɲkwa á sawa vayiya, ura á dzegwánka mága slera mázla-aara. ⁵ Am sarte na zlaɓe yá aɲkwa am duniya na wá, ya parakkire ge duniya.»

⁶ Ba a ndaase elva ɲanna, mazle-aara a naba kyefaa nyaihe á dem áhá, a wasletaa egdza haha cekwaɲgudí an nyaihe-aara, a ndaɓanaanuhe ge ice á wulfe na, ⁷ a ba ɲane á elvan ge ɲane: «Ezzlálá de baraabára ice á ɲa am derve na tá ɗaná an Silauwam na.» Silauwam ɲanna wá, amaana: slebela. A duhe ge wulfe na, a de baraa

ice-aara wá, anƙwa a nanna. Á sá wá, ba lanƙe ice-aara.

⁸ Daaci emnde a slala-aara, antara emnde na ndza ta naa á ɲala na, a ba itare: «Una ni ba wulfe na á ɲala, á njá áhuwa na ka?» ⁹ A ba emnde umele; «Ba ɲane». Amá a ba emnde umele: «Una ɲaneka, ba gáráva.» Amá «Una ba iya,» a ba ɲane á elvan ge itare. ¹⁰ Ta ndavanu elva: «A wertaa estara ice á ɲa?» a ba itare tá elvan ge ɲane. ¹¹ A ɲwaterante, a ba ɲane: «Anƙwa ura zhera-aara Yaisu, a wasletaa haha cekwaanƙuɗi, a naba ndabinu ge ice-aaruwa wá, a ba ɲane á elvan ge iya, ezɓlálá de baraabará ice á ɲa am derve á Silauwam. Ya naba duhe á dete we á derve ɲanna, ya baraa ice-aaruwa wá, yá nanna ice.»

¹² «Áma zhel ɲanna?», a ba itare tá elvan ge ɲane. «Diyanka», a ba ɲane á elvan ge itare.

**Farisa-aha tá ndavanu elva ge ura wulfe ta yanaa an ɲane*

¹³ Daaci ta naba dá zhel na ndza wulfe, amá shánsha ice-aara na ádeza *Farisa-aha. ¹⁴ Adaba háre na ni Yaisu a wasletaa egdza haha, a ndabanuɲe ge ice á wulfe na wá, kwaskwe á puwansepuwe. ¹⁵ Adaba una ɲanna, Farisa-aha ta ndavanu ge zhel ɲanna, a ba itare tá elvan ge ɲane: «A mágava estara ɲane kina ká anƙwa á nanna ice na?» A ɲwaterante, a ba ɲane: «Ba a wasletaa egdza haha, a ndabinuɲe ge ice, ya de baraa ice-aaruwa wá, yá anƙwa á nanna.» ¹⁶ A ba emnde umele am dágave á Farisa-aha: «Ma a maganaa ware una ɲanna keni, a belanaa Dadaamiya ka defikdefiki, adaba anƙwa á badza

kwaskwe á puwansepuwe.» Amá a ba emnde umele-aatare: «Slehaypa ni á dzegwándzegwa mága najipu-aha na?» Daaci ye-aatare gevge gergere.

¹⁷ *Farisa-aha ta ndavanu elva zlaḅe á dāliye ge wulfe na shánsha ice-aara na: «Ekka mu ázara a ba elva á ḡa áte edda una a werakanta ice ḡanna?» A ba ḡane: «Nabi á Dadaamiya.»

¹⁸ Mazla-aara eksararka male-aha á Yahudiya-aha ganakini zhel ḡanna ndza wulfe werre, a shanaa an sha ice. Ta naba ḡetaa tara eddeḡara an emmeḡara. ¹⁹ Ta se ndavateruhe, a ba itare: «Una ba jirire ba egdza á kure emtu? Ndaundá ba jirire ndza kwa yán ba wulfe emtu? Ay a sawa estara á nanna ice na?»

²⁰ Ta ḡwaterante ge tara eddeḡara an emmeḡara, a ba itare: «Egdzere wá, ba egdza á ḡere, ḡa yese ba wulfe. ²¹ Amá ma a shanaa estara ice keni diyaḡerka, ma a vantaaware ice keni diyaḡerka. ḡane keni egdzere-ka mázla-aara, ndavawanundave ba ge ḡane, a ḡwuteḡwa ba ḡane an ire-aara.» ²² Ta ndaa una tara eddeḡara an emmeḡara na wá, aḡaba a wáterá lyáwá á tuge male-aha á Yahudiya-aha. Aḡaba zlaruzle male-aha á Yahudiya-aha am sawari-aatare, geni ma a ndaasa ware Yaisu wá, *Almasiihu, tá ḡgyansenḡye edda-aara am jeba-aatare ba ḡekideki. ²³ Ta ndaaná aḡaba una ḡanna tara eddeḡara an emmeḡara: ḡane keni egdzere-ka mázla-aara, a ḡwuteḡwa ba ḡane an ire-aara na.

²⁴ *Farisa-aha ta ḡante zhel na ndza wulfe, shánsha ice na ge buwire, a ba itare tá elvan

ge njane: «Njere wá, diyanjerdiya ganakini zhel njanna slehaypa. Azara á ba elva á ña? Enndá jirire á katafke á Dadaamiya!» ²⁵ A njwaterante, a ba njane á elvan ge itare: «Iya wá, ma anjkwá haypa-aara, ma ñaaka haypa-aara keni diyanka ya. Duksa palle ya disaa ya wá, ndza ya wulfe, kina wá, yá anjkwá á nanna.»

²⁶ Ta ndavanuhe zlafe ádaliye, a ba itare tá elvan ge njane: «A magakaa uwe lauktu a wertehe ge ice á ña na?» ²⁷ A njwaterante, a ba njane: «Ábi ya ndakurndáhá cenakurka. Kwá kátá yá bakurá uwe kena ádaliye? Emtu kure keni kwá kátá gev emnde a dábá njane?» ²⁸ Tá zlazlevaahe, a ba itare tá elvan ge njane: «Ká sledfaba njane ba ka! Njere wá, ña emnde a dábá Muusa. ²⁹ Adábá Muusa wá, diyanjerdiya ta ndaa elva an Dadaamiya, amá njane ba tate na á sawa átekwa, diyaa ware?»

³⁰ A ba zhel na: «Kwaye kwa najipu! Zhel na a weritaa ice na ni diyakurka kure tate na a sawa átekwa? ³¹ Amá wá, diyamidiya slehaypa wá, Dadaamiya á njwanárka ñekidfeki, sey edda una ni á gálá njane, antara á maga namaari-aara. ³² Kwaye á ba am fakta á duniya keni, vaci palle ndza cenamiyánka ta weranantaa ice ge wulfe na ta yanaa an njane. ³³ Daaci zhel njanna, ma andze a belanaa Dadaamiya ka wá, ma andze á dzegwánka ba mága uwe keni.»

³⁴ «Ka wá, ka slehaypa kwaye á sawa am huðe á emmeña, ká kwarañersá ka duksa ge njere emtu?» Daaci ta naba njyanse á segashe am mashidi.

Yaisu á ndáhá elva á wulfire am ervaunŋŋe

³⁵ Am sarte na cenáncena Yaisu ganakini ngyaransengye maa, a naba de tataya tate-aara. De shánsha, a ba ɲane á elvan ge ɲane: «Faktarefe áte *Ura á emnde bademme emtu?»

³⁶ A ɲwanante a ba ɲane: «Ɔane mu ware ɲane malum, geni yá fetarfe áte ɲane?» ³⁷ A ba Yaisu á elvan ge ɲane: «Ká zhárá ba ɲane maa, ba edda una á ndaaka elva na.» ³⁸ «Fanaktarfe Yaakadada», a ba ɲane á elvan ge ɲane, a kezlanaa ugje am áhá.

³⁹ Daaci a ba Yaisu: «Sawa-aaruwa ge iya á sem duniya na wá, ya se lá wulfe-aha geni itare tá shánsha tá nánna duksa. Amá emnde na ta bantsa itare tá nanna na wá, tá gevge wulfe-aha.»

⁴⁰ Cenaráncena *Farisa-aha na tá anƙwa áhuwa na, a ba itare tá elvan ge Yaisu: «Ɔere keni ɲa wulfe-aha emtu?» ⁴¹ A ba Yaisu á elvan ge itare: «Ma andze kwa wulfe-aha wá, ma baaka haypa á kure. Amá kwa bántsa kure anƙwa ice á kure tsawe wá, haypa á kure ba nja-aara.»

10

Suni shagera an kyawe-aha-aara

¹ A ba Yaisu á elvan ge itare zlaŋbe ádaliye: «Yá ndaakur ba jirire: má ura á dem gargare á kyawe-aha ni, daaka á kya we-aara, a naba tsekweme á kyá ire á riya wá, edda-aara ɲanna neyle, slezá baráma. ² Amá edda una ni á duwa á kya we á gargare wá, ba ɲane una suni á kyawe-aha. ³ Daaci slewera gargare, á

weranántewera gargare ge suni, ñane á dáhá kyawe-aha-aara an zhera an zhera, kyawe-aha tá cenáncena kwárá-aara, tá edfaba ásegashe. ⁴ Máki saterse ásegashe maa, á dedda ñane á katafke, tá dábáná kyawe-aha-aara á kataliya, adaba diyardiya kwárá-aara. ⁵ Amá kyawe-aha tá dábeka edda una diyarka, á wáterá lyáwá átuge ñane, adaba diyarka kwárá-aara.»

⁶ Kwaya ñane naraje na a baternaa Yaisu, amá cenaránka naraje-aara, ma a bateraa elva áte uwe keni.

Yaisu suni shagera

⁷ Lauktu a ba Yaisu á elvan ge itare: «Yá ndaakur ba jirire: Ba iya una ya we á gargare á kyawe-aha. ⁸ Bademme á emnde na ta sawa ákatafke-aaruwa, ta ba neyle-aha, ta emnde a zá baráma. Adaba una ñanna diyaraterka kyawe-aha, cenarka elva-aatare. ⁹ Ba iya una ya we á gargare. Ma ware una á dema á kya ya á dem gargare na, á shánsha ire-aara, á duwa á ba an enkale-aara, á sesse keni á ba an enkale-aara, á shánsha náza zá-aara á ba an unñule-aara. ¹⁰ Neyle wá, á sá ba mága neylire geni á icica, á kedánaakeda. Amá iya wá, ya sawa ganakini kyawe-aha tá shánsha shifa, tá njinja an shifa-aatare lanje.

¹¹ «Ba iya una ya suni shagera. Ya suni shagera na ni yá dzameka shifa-aaruwa dekideki adaba kyawe-aha-aaruwa. ¹² Amá suni na á piyá ba geni a shánsha mbera-aara, ñane gevka edda á kyawe-aha wá, gevka suni shagera. Máki

nanna anƙwa á sawa indale wá, á zhagada ire-aara, daaci á kyateraakya indale kyawe-aha na, á dzadzatervedzadze. ¹³ Á zhagada shifa-aara, aƙaba ɗane baaka lambe-aara áte kyawe-aha. Á dzámá ba mbera-aara palle. ¹⁴ Ba iya una ya suni shagera, diyandiya kyawe-aha-aaruwa, itare keni diyaridiya ¹⁵ ba seke una ni a diyidiya Edderwa, iya keni diyandiya ɗane na. Yá dzameka shifa-aaruwa deƙidƙe aƙaba kyawe-aha-aaruwa. ¹⁶ Iyau, zlaƙe tá anƙwa kyawe-aha-aaruwa umele ágashe, saremka á sem walde. Shagera ba yá satersa itare keni á sem walde, tá se cena kwára-aaruwa. Tá se njá am walde palle, suni á gev ba palle.

¹⁷ «Wayiwáya jipu Edderwa, aƙaba eksanarekse yá shifa-aaruwa, watse yá shánsha zlaƙe ádaliye. ¹⁸ Iya wá, baaka ura á dzegwándzegwa já shifa-aaruwa, ya eksera ba ya emtsa. Yá naba emtsemtsa, amá ya an hakuma á tse am faya. Yá magán ba seke una a binaa Edderwa.»

¹⁹ Elva-aara ɗanna a tsante elva yaikke zlaƙe ádaliye am dagave á Yahudiya-aha. ²⁰ Kwakya emnde am dagave-aatare ta baa: «Ura an jini am ire, an wesha ire-aara, kwá cena uwe áte elva-aara?» ²¹ A ba emnde umele-aatare: «Una fida, ura an wesha ire-aara wá, á taa ndaaseka elva estuwa. Há! Ura an wesha ire-aara ni á weratertá ice ge wulfe-aha?»

Kwalarekwále Yahudiya-aha ge fetaare áte Yaisu

²² Daaci samsa sarte á mága muɗri á wera *mashidi yaikke am Urusaliima maa, ta naba

gyaa munri. Sarte nanna, sarte á lailaidfire. ²³ Daaci vacite umele, ankwá á já dāba Yaisu am dzadzāwe á mashidi, am tate na tá dāháná an dzadzawe á Suleymanu na maa, ²⁴ de jarammeje zlaḅe á dāliye Yahudiya-aha á katafke-aara, a ba itare tá elvan ge nane: «Máki ba jirire ba ka una ka *Almasiihu á Dadaamiya wá, ndanerdá jirire-aara, geni a shunḅuleka ire á nere mázle-aara. Kinekinēka nā ufa ba una ázeḅa.»

²⁵ A nwaterante ge Yaisu, a ba nane á elvan ge itare: «Ábi ya ndaakurndaha fakurtaareka áte ya. Slera na yá ankwá á maganá ya na wá, yá maganá á ba an hākuma á Edderwa. Una nanna á bakurá ba elva ge kure áte ya, ma ya ware keni. ²⁶ Aley kwá fetareka áte ya, adāba kwa kyawe-aha-aaruka. ²⁷ Kyawe-aha-aaruwa wá, tá cena kwárá-aaruwa, tá dābidāba, iya keni diyana-terdiya. ²⁸ Yá vaterte shifa na á zleka na, tá emtseka dēkideki, baaka ura á dzegwāndzegwa saterse am erva-aaruwa. ²⁹ Edderwa na a vite kyawe-aha nanna, yaikke ba nane arge duksa bademme. Baaka ura á dzegwāndzegwa sanse kyawe-aha nanna am erva á Edderwa. ³⁰ Iya antara Edderwa nā ba palle.»

³¹ Daaci Yahudiya-aha ta naba haletaa nákwá zlaḅe á dāliye, tá kátá ejja. ³² A ba Yaisu á elvan ge itare: «Náwa kwakya slera shagera shagera na ya maganaa ya am dāgave á kure an hākuma á Edderwa. Kina kwá kátá jiyá an nákwá adāba ura-ara palle?» ³³ A ba Yahudiya-aha nanna tá elvan ge nane: «Ŋá jáká an nákwá adāba shagerire na ka maganaa ka ka. Amá nā

jáká aɗaba elva mándzawe na ká ndaná ka áte Dadaamiya. Ka keni ka ba urimagwe, amá ka ganve ire á ña Dadaamiya.»

³⁴ A ba Yaisu á elvan ge itare: «Ankwa an puwa am *tawraitá á kure, a ba Dadaamiya: Kure kwa dadaamiya-aha. ³⁵ Diyamidiya názu an puwa am wakita á Dadaamiya wá, baaka ura á ebzebza. Dadaamiya a detaa emnde na ni a vaterte elva-aara ta dadaamiya-aha. ³⁶ Janateruka ya ge emnde ñanna emtu, ya na a eksisaa ba Dadaamiya, a beliyaa á sem duniya? Kwa baa yá ankwa á zlazla Dadaamiya, aɗaba ya baa: ya *Egdza á Dadaamiya? Áma ñane zláze ñanna? ³⁷ Máki kwá ezzhárá slera na yá maganá ya slera á Edderwa ka, fautareka áte ya. ³⁸ Amá máki yá mága ba slera á Edderwa ba jirire wá, ma kwá fetareka áte ya keni, fautarefe kure á ba áte slera-aaruwa ñanna, geni kwá diyeddiye jirire-aara, ganakini iya antara Edderwa ña ba palle.»

³⁹ Tá kátá ekseksa, amá sharánka zlaɓe ádaliye. ⁴⁰ A zlalehe ge Yaisu á dete iga a guwa á Urdun, tate á mága baptisma á Yuhanna, a de njehe áhuwa. ⁴¹ Amá kwakya emnde ta kelaa á dezeńara. Ta bántsa emnde ñanna am dagave-aatare: «Yuhanna wá, baaka najipu na a maganaa ñane, amá baɗemme á názena a ndaanaa ñane áte zhel na baɗemme ba jirire.» ⁴² Emnde kwakya fartarfe áte ñane am tate ñanna.

Emtsamtsa Laajarus

¹ Anƙwa zhel emnde a Baytaniya umele zhera-aara Laajarus wá, lapika ba zlazlaɗa. Egdzar mama-aha-ɗara ɗwasha, tara Marta antara Maari keni tá á ba am ekse ɗanna. ² Maari ɗanna wá, ba Maari na ndza a puwar náza se áte sera ge Yaakadada, a halanaahe an úgje á ire-aara na. Laajarus lapika na egdza emmenjara ge Maari ɗanna.

³ Daaci egdzar mama-aha ɗwasha buwa ɗanna, ta naba belanve ura ge Yaisu, a ba itare tá elvan ge ɗane: «Yaakadada, náwa lapika ura á ɗa Laajarus.» ⁴ Cenáncena Yaisu labare ɗanna maa, a ba ɗane: «Lapikere á Laajarus á taa jeka shifa-aara. Amá watse tá nanna emnde yaikkire á Dadaamiya, antara yaikkire á Egdza-aara keni, aɗaba lapikere-aara zhel ɗanna.»

⁵ Yaisu wayatertewáyá jipu tara Maari antara Marta ira Laajarus. ⁶ Aɗaba una ɗanna daaka watsewatse am sarte na a cenaa labare á lapikere á Laajarus na. A gaa háre buwa am tate ɗanna, am iga-aara lauktu a tse, a duwa.

⁷ Am iga a háre buwa ɗanna maa, a ba ɗane á elvan ge pukura-aha-aara: «Mi zláláwa, mi eptsá ádaliye á dem Yahudiya.» ⁸ A ba pukura-aha-aara tá elvan ge ɗane: «Malum, á ba am háre-aha na tá kátá jakjá Yahudiya-aha á ba an nákwá ni, ká kátá eptsá ádaliye á ba ádehuwa?» ⁹ A ba Yaisu á elvan ge itare: «Diyakurdiya emtu ganakini anƙwa saa kelaawa ju buwa am váha palle? Máki ura á zlála an vaciya wá, á jeka ektápaare. Aɗaba anƙwa parakkire am duniya.

¹⁰ Amá máki edda-aara á zlalá an vayiya wá, á naba ejja ektápaare, adaba baaka parakkire am nane.»

¹¹ Am iga á elva-aara nanna maa, a ba nane zlafe adaliye á elvan ge itare: «Ankwa á paa háre ura á miya Laajarus, amá yá de tsantetse am háre-aara nanna.» ¹² A ba pukura-aha tá elvan ge nane: «Yaakadada máki á pupe háre wá, una watse á mbembe.» ¹³ Yaisu ankwa á baterá baaka Laajarus emtsamtsa, pukura-aha ta kurken á ndater ba háre á jirire. ¹⁴ A naba ndaterse ba parakke Yaisu, a ba nane á elvan ge itare: «Baaka emtsamtsa Laajarus. ¹⁵ Iya wá, yá higa jipu adaba lámare nanna a shaa Laajarus am iga-aaruwa. Una a magava estuwa na wá, adaba ba kure, geni a farfe zlafe adaliye fetarfire á kure áte iya. Daaci tsaumitse, mi zlaláwa mi dezeńara.» ¹⁶ A ba Taumas, (Wulhe keni ba zhera-aara,) a ba nane á elvan ge pukura-aha umele: «Mi keni mi zlalawa, mi de emtsa ba kerde antara nane.»

Ba Yaisu una sletsa emnde am faya

¹⁷ Lauktu á daada Yaisu á dem Baytaniya maa, a de beraa hedarehe Laajarus zlauzle, háre-aara ufade am evege. ¹⁸ Ekse á Baytaniya nanna ba herzhe an Urusaliima á maga ba kilaumaiter keye. ¹⁹ Yahudiya-aha kwakya ta sem mba á tara Maari antara Marta, ta se gater use adaba a kedaa egdza emmetare.

²⁰ Am sarte na cenáncena Marta ganakini sámisa Yaisu maa, a naba tsetehe, a zlala á de yainuye áte baráma a sawa. Maari wá,

ɲane a nja am mba. ²¹ A ba Marta á elvan ge Yaisu: «Yaakadada, ma andze ká anƙwa áhuna wá, egdza emmerwa ma andze á emtseka deƙideƙi. ²² Amá ba kina keni diyandiya ganakini Dadaamiya á yakveka názena ka ndavanuwa ka.» ²³ A ba Yaisu á elvan ge ɲane: «Sey á sesse egdza emmeɲa á ba an shifa-aara.» ²⁴ «Diyandiya,» a ba Marta. «Diyandiya ganakini watse á tsetse vaci tsa emnde á faya am halavuwa á duniya.»

²⁵ A ba Yaisu á elvan ge ɲane: «Ba iya una ya edda tsa emnde am faya, ba iya una ya slefaterem shifa na á zleka na am vuwa ge emnde. Má ura fetarfe áte ya wá, ma emtsamtsa keni á tsetse á ba an shifa-aara. ²⁶ Ma ware una an shifa, a fetaare áte ya, á emtseka edda-aara deƙideƙi. Faktarfe emtu áte elva-aaruwa na?» ²⁷ «Ane fantarfe», á ba Marta, «fantarfe ganakini ba ka una ka *Almasiihu, ka *Egdza á Dadaamiya, ba ka edda una diyaɲerakdiya ganakini watse ká sawa á sem duniya na.»

Sesse yawe á kyuwa ge Yaisu

²⁸ Am iga á elva-aara ɲanna Marta wá, ba eptsaaara a detevege egdza emmeɲara Maari, a de mbedanuhe an nasherire, a ba ɲane á elvan ge ɲane: «Samsa Malum anƙwa á ndavakndává.» ²⁹ Ba tara cenáncena, antara ba tsetse-aara ge Maari, a duhe ádezeɲara. ³⁰ Amá zlaɓe samka Yaisu á sem huɗe á ekse emtsaade, zlaɓe á ba am tate ɲanna a de yainuwa Marta na. ³¹ Tsetsa Maari an hádzala á segashe maa, baɗemme á Yahudiya-aha na tá njá ázeɲara, ta

de gater use na keni, tá sa edfaba. Itare ta kurken á de kyuwa áte irekhya.

³² Dámnda Maari á deza Yaisu, a kezlaa ugie á katafke-aara, a ba ñane á elvan ge ñane: «Yaakadada, ma andze ká aᅇkwa áhuna wá, ma andze á emtseka egdza emmerwa dfekideki.»

³³ Daaci Yaisu á zhára ba á kyuwa Maari na, Yahudiya-aha na ta daa edfaba na keni bademme tá aᅇkwa kyuwa. Una ñanna wantewa jipu am ervaunde ge Yaisu. ³⁴ A naba ndavateruhe, a ba ñane á elvan ge itare: «Kwa hedanaa áme ñane emtsa ñanna?» «Sawa ná marakanaamárá Yaakadada», a ba itare tá elvan ge ñane. ³⁵ Daaci sessa yawe á kyuwa ge Yaisu keni. ³⁶ Daaci a ba Yahudiya-aha: «Kay, zhel na wayawáyá jipu an Laajarus na.» ³⁷ Amá a ba emnde umele-aatare: «Ábi ba ñane una a weranante ice ge zhel wulfe na? Ay ábi ma andze á janviyaaka piyeta emtsa á Laajarus keni?»

Yaisu tsantetse Laajarus am faya

³⁸ Wantewa zlafe ádaliye am ervaunde ge Yaisu, a naba duhe á dete irekhya ñanna. Irekya ñanna keni, ndza ta yese ba evege ba estuwa am uksuwe á palaha, ta hedanuhe an palame.

³⁹ Daaci a ba Yaisu: «Tambarawanvuwetámbara palame ge we á evege.» A ba Marta egdza emmenara ge edda una am evege: «Yaakadada, watse á se kwakya degi mazla-aara, adaba háre ufade vatena ehhedfa-aara.» ⁴⁰ A ba Yaisu á elvan ge ñane: «Ndza ndaanaᅇka a ba iya, máki fak-tarefe watse ká nanna yaikkire á Dadaamiya?»

⁴¹ Daaci ta naba tambaranvuwe páláme na ge we

á evege. A kante ice-aara á dem samaya Yaisu, a ba ñane: «Yá aṅkwa á slafaká we-aaruwa Edderwa, adaba cenakivaarcene. ⁴² Diyandiya ganakini ká aṅkwa cenivaarcene ma vaatara keni, amá ya ndaa una adaba emnde na náwa itare tá ázerwa na, geni a fartarfe ganakini ka beliyaa ba ka.»

⁴³ Am iga á maduwa-aara maa, á ba ñane á ba an ka kwará: «Laajarus, sesse á segashe!»

⁴⁴ A sessehe ge Laajarus antara ba kálpákane na ndza ta fademe am hude-aara na bademme. Sera-aha-aara, antara erva-aha-aara, ira ire-aara bademme á ba an fádá. A ba Yaisu: «Palawanaapále áte ñane, belawanaabelá.»

Yahudiya-aha tá aṅkwa maga pute a eksa Yaisu

(Mat. 26:1-5; Mark. 14:1-12; Luka 22:1-2)

⁴⁵ Dikele á Yahudiya na ta de gater use ge tara Maari na, ba ta naa najipu na ni a maganaa Yaisu na wá, ta naba fetarhe áte ñane. ⁴⁶ Amá á ba am dagave-aatare, emnde umele ta de balaterse názena a maganaa Yaisu na bademme ge *Farisa-aha. ⁴⁷ Daaci Farisa-aha, antara male-aha á *liman-aha ta jema a emnde a *kendekyiya yaikke, a ba itare: «Mí magáná estara kina? Náwa zhel na aṅkwa a far ba mága najipu-aha? ⁴⁸ Máki mí zharaná á ba an ice wá, watse bademme á emnde tá fetarfe áte zhele na. Daaci watse á tsetse elva yaikke, watse tá demda emnde a Rauma na tá an hakuma na á dem elva ñanna, watse tá mbedanaambeda mashidi á miya yaikke na, tá kefanaakeda larde á miya.»

⁴⁹ Daaci a ba Kayafas, ñane male á *liman-aha am sarte ñanna, a ba ñane á elvan ge itare: «Kure wá, baaka názu kwa disaa kure emtsaade. ⁵⁰ Diyakurka ganakini máki jamija shifa-aara ñane palle á emtsemtsa adaba emnde, á shansha ire-aara larde á miya emtu?» ⁵¹ Amá wá, a ndaanaa ñane an ire-aara ka una ñanna. Am ba ñane una a gev male á liman-aha am sarte ñanna, a maganaa ba Dadaamiya geni á maganaamaga nabiyire áte Yaisu, geni a emtsemtsa Yaisu am kela á Yahudiya-aha bademme. ⁵² Am kela á Yahudiya-aha ka palle, amá geni á jatermarje ge egdzara á Dadaamiya na tá am huđe á duniya bademme tá gevge palle.

⁵³ Daaci male-aha á Yahudiya-aha ta magaa sawari á ja shifa á Yaisu ba vacite ñanna. ⁵⁴ Adaba una ñanna Yaisu dalika á jadaba am dagave á Yahudiya-aha áte parakkire. A naba zlalehe á dem ekse umele tá daháná an Aifrayim herzhe an kaamba, ta de nja áhuwa antara pukura-aha-aara.

⁵⁵ Herzhevteherzhe munri á Yahudiya-aha na tá daháná an *Paska na maa, bademme á Yahudiya-aha na tá am ekse-aha umele, tá anƙwa jahava á ba á dem huđe á Urusaliima zlaƙe samka hare-aha á munri emtsaade, geni tá de maga náde á cufedfire ge ire-aatare, lauktu tá za munri. ⁵⁶ Am sarte na jarammeje emnde am mashidi wá, ta tátaya Yaisu. A ba itare am dagave-aatare: «Watse á ba á sawa zhel na á sem munri? Emtu estara a ba kure?» ⁵⁷ Ta ndanaa adaba uwe estuwa, adaba a ba male-aha á *liman-aha antara *Farisa-aha, ma a naanaa

ware tate á Yaisu keni, a shebeka, itáre tá de ekseksa.

12

*Maari a puwanante náza se áte sera ge Yaisu
(Mat. 26:6-13; Mark. 14:3-9)*

¹ A juwaa ba háre unkwahé tá gyá muŋri á *Paska wá, damda Yaisu á dem Baytaniya ekse á Laajarus na a tsante am faya na. ² Ta naba gyanaa dafa ge Yaisu am ekse ɲanna. Tara Yaisu antara Laajarus ira emnde umele tá arge dafa. Marta wá, ɲane slevaterte dafa ɲanna antara kazlaɲa-aara baɗemme.

³ Daaci duwa á Maari, a naba eksetaa náza se-aara kyalma á liter zlázláɗa gane-aara jipu. Náza se ɲanna wá, tá gyaná an nardisa. A naba puwanante áte sera beɗbeɗbeɗe ge Yaisu, a halanaahe an úgje á ire-aara. Daaci baɗemme á huɗe á bere ba se á náza se na. ⁴ A ba Yahuda Iskariyaut palle á pukura-aha-aara, edda una watse á de valateru ge Yaisu kelaade-aha keni ba ɲane ɲanna, a ba ɲane: ⁵ «Labára kwá maga una? Ma tá veluka náza se zlázláɗá seke una, ma gursa kul vuye keni, daaci ma tá tegatertega ge talage-aha!» ⁶ Ndahaaka una aɗaba slezatervaare ge talage-aha, amá aɗaba ɲane neyle. Á ɲáná ɲane shunɣu-aatare, amá aɲkwa á ilila. ⁷ A ba Yaisu: «Weshawananteka ire ge mukse na. Aɗaba aɲkwa á maginá ɲane zunɲwe slera a vacite na má watse tá heɗiheɗa na. ⁸ Talage-aha wá, ma vaatara keni tá á ba ázekure. Amá ya wá, watse ya baaka ázekure.»

*Male-aha á *liman-aha tá ngwadá sawari á já shifa á Laajarus*

⁹ Cenaráncena Yahudiya-aha ganakini anƙwa Yaisu am Baytaniya maa, baɗemme ta berdava á ba ádehuwa. A dáteraa ba wedere á Yaisu ka palle, ta de zharanaa antara Laajarus na a tsante am faya na. ¹⁰ Daaci male-aha á *liman-aha ta ngwadáa sawari-aatare geni sey tá keƙanaakeda shifa á Laajarus keni. ¹¹ Adɓaba Yahudiya-aha kwakya eptsaraterveptsá iga ge itare, ta fetaare áte Yaisu adaba ɗane.

Yaisu á dem huɗe á Urusaliima

(Mat. 21:1-11; Mark. 11:1-11; Luka 19:28-40)

¹² Makuralla-aara wá, baɗemme a nalgaadama á jamme am huɗe á Urusaliima ta se za muɗri á *Paska na, cenaráncena ganakini anƙwa á sawa Yaisu á sem huɗe á Urusaliima. ¹³ Baɗemme-aatare ta naba ɗatsemaa hyema á debina am erva, daredde á de lyiya Yaisu an ɗane áte barama. A ba itare á ba an ká kwara: «Galau-gala Dadaamiya! A gagga Dadaamiya barka ge ekka na ká sawa an zhera á Yaakadada na. A gagga Dadaamiya barka ge ekka, ka slekse á *Iserayiila.»

¹⁴ Am sarte ɗanna, Yaisu shansha ezzeɗwa zlauzle, a njete áte ezzeɗwa ɗanna, gevge á ba áte una á ndahaná wakita á Dadaamiya, a ba ɗane:

¹⁵ «Ekkure emnde a berni á *Siyauna, a wakurka lyawa ɗekideki, kwaye á sawa slekse á kure áte úma á ezzeɗwa.»

¹⁶ Am sarte ɗanna wá, ndza cenaránka emtsaade pukura-aha jirire-aara. Sey am sarte na zlazlálá

Yaisu á dem yaikkire-aara, lauktu saasa á sem ire-aatare bademme, geni názena ta magannaa emnde ge Yaisu na ba kalkale antara una a ndaanaa wakita á Dadaamiya áte nane.

¹⁷ Vacite na Yaisu a daase Laajarus am irekhya, a tsante am faya na wá, emnde kwakya tá anƙwa áhuwa. Ta de balatersaa emnde nanna ge emnde umele názena ta nannaa itare. ¹⁸ Adaba una nanna emnde bademme ta se yainu ge Yaisu. Adaba cenarácena najipu na a maganaa nane. ¹⁹ A ba *Farisa-aha am dagave-aatare: «Zharauzhára, bademme á emnde tá zhagade á ba á dezeńara! zhel na degiya mi danuka?»

Yunaninkau-aha tá kátá deza Yaisu

²⁰ Tá anƙwa Yunaninkau-aha umele am dágave á emnde na ta sem Urusaliima ge se kezlan ugje ge Dadaamiya am muñri na, ²¹ ta duhe ge Yunaninkau-aha nanna á deza Filip, ura Baytisayda am kwára á Galili, a ba itare tá elvan ge nane: «Malum njá kátá deza Yaisu». ²² A tsetehe ge Filip a de mbedfanu elva nanna ge Andere, daaci bukerde-aatare ta duhe á deza Yaisu, ta ndaanhe.

²³ A ba Yaisu á elvan ge itare: «Hyephye sarte a zlalá *Ura á emnde bademme á dem yaikkire-aara. ²⁴ Yá ndaakur ba jirire: Ice á hiya palle, máki jakemka am haha kedakanaakeda, ma vaatara keni ba nane palle nanna. Amá máki jakemja am haha kedakanaakeda wá, á yá egdzere kwakya. ²⁵ Daaci ma ware una a wayete shifa-aara keni á de kedanaakeda, amá edda una a yaa shifa-aara am duniya na wá, á shá shifa na

á zleka na. ²⁶ Edda una má á kátá magiya slera ge iya wá, sey á d'abid'ába. Daaci tate na ni ya átekwa ya na wá, sleslera-aaruwa keni á de njá á ba áhuwa. Ma ware una á magiya slera ge iya na, Edderwa á gálá ba ηane.»

Yaisu anƙwa á ndáhá elva a emtsa-aara

²⁷ A ba Yaisu kina wá: «Yá anƙwa dzámá ire! Yá baná uwe kina ge Edderwa? Yá baná: Eddaaye, piyetepiya zlad'a-aaruwa na emtu? Yá ndaaka una d'ekid'eki. Adaba a siyaa ba una ηanna á sem duniya. ²⁸ Arge una ηanna wá, náwa názena ni yá banán ge Edderwa: Eddaaye, emmága slera á ηa am emnde geni a diyareddiya yaikkire á ηa.» Daaci tá cená ba kwárá yaikke á ndáhá elva á sawa am samaya, a ba ηane: «Maranateránmárá zlauzle yaikkire-aaruwa ge emnde, amá yá marateránmárá zlaɓe ádalije geni a galarigálá emnde.»

²⁹ Emnde na tá anƙwa áhuwa cenáráncena kwárá ηanna, amá a ba emnde umele válaha á samaya, a ba emnde umele keni, anƙwa á ndaan elva malika. ³⁰ Yaisu a ndaterse jirire-aara, a ba ηane á elvan ge itare: «Kwárá ηanna á biyá elva ge iya ka, amá á bakurán ge kure. ³¹ Sarte na náwa ηane na wá, á kyaavekye shairiya á duniya na, tá eblyanseblye slekse á duniya na á degashe. ³² Iya wá, má watse kariteka ya áte haha na, a detire wá, baɗemme á emnde watse yá sátersa ásezerwa.» ³³ Kwaya ηane sera á elva-aara na a pálá jeba á emtsa na ni á de emtsa ηane na an ηane.

³⁴ Daaci a ba emnde tá elvan ge ñane: «Aṅkwa an puwa am *tawraita ña cenáncena wá, *Almasiihu wá, á emtseka ðekideki. Ekka keni a ba ka sey tá kanteka *Ura á emnde bademme á detire. Ware ñane *Ura á emnde bademme ñanna?» ³⁵ A ñwaterante ge Yaisu, a ba ñane á elvan ge itare: «Kina wá, zlaḃe aṅkwa parakkire am dáḡave á kure na wá, dawmbare á ba á de katafke, a se shakurka tabedammire. Adaba edda una á zláá am tabedammire diyaaka ba tate na á detekwa keni. ³⁶ Adaba una ñanna, fautarefe áte parakkire am sarte na ni aṅkwa parakkire ázekure, geni kwá gevge emnde a zláá am parakkire.»

Kwalarevkwale Yahudiya-aha ge fetare áte Yaisu

Ba a ndaase elva-aara Yaisu wá, a naba zlalehe ba yiyiye an itare, a de sheḃevhe duksa-aara. ³⁷ Yaisu maganaamaga tsa najipu-aha gergere naránna an ice-aatare, aley fartarka ðekideki áte ñane. ³⁸ Una ñanna gevge á ba áte una ndza a ndaana nabi Aisaya am nabiyire-aara, a ba ñane:

«Yaakadada, aṅkwa ura a fetaare áte waazu á ñere emtu? Yaakadada mu a maraná hákuma-aara ge ware ñane?»

³⁹ Zlaḃe ádaliye, dzegwaránka fetarfe na wá, gevge elva na ndza a ndaana nabi Aisaya am nabiyire-aara, a ba ñane:

⁴⁰ «Dadaamiya a hadateraa ice geni a naránka an ñane, a vaterte degdegire á ire, geni a cenarvaaka elva-aara. Bademme á una

ɲanna wá, ba geni a saremká ásezerwa geni yá mbateraambe.»

⁴¹ Nabi Aisaya a ndaa una ɲanna na wá, adaba á ba am date keni ɲane nanna Yaisu am yaikkire-aara lauktu a magaa nabiyire ɲanna áte ɲane.

⁴² Am una ɲanna wá, á ba am dágave á male-aha á Yahudiya-aha keni kwakya emnde na fartarfe áte Yaisu, amá ndarseka parakke, adaba ta kuva ice á *Farisa-aha, geni a ɲgyaraterseka am jeba á Yahudiyire ba dekidfeki. ⁴³ Ta hayaa ba ɲgáhire na tá sháná áza emnde, arge ɲgáhire na á de vatertá Dadaamiya.

Am halavuwa á duniya elva á Yaisu á de mbaɗa emnde am shairiya

⁴⁴ Daaci a kante kwará á ba an ndzedfa Yaisu, a ba ɲane: «Ma a fetaara ware áte ya keni, a fetaara áte ya palle ka, amá a fetaare áte edda una a belibela na keni. ⁴⁵ Ma a niyaa ware keni, edda-aara náanna edda una a belibela na keni. ⁴⁶ Sawa-aaruwa á sem duniya na wá, ya parakkire ge duniya, geni ma a fetaara ware áte ya keni, a njeka am tabedammire mázla-aara. ⁴⁷ Ma a cenanaa ware elva-aaruwa, amá magaka fesarfire wá, yá ɲgudfaná ya ka edda-aara. Adaba sanká á se ɲgwada emnde a duniya, amá ya se lyaterlya. ⁴⁸ Ma a yiyaa ware, ma a yanaa ware elva-aaruwa keni, aɲkwa názena ni á de mbeda edda-aara am shairiya. Ba elva-aaruwa ɲanna a cenevaa ɲane, amá fetareka na wá, á de mbedaná ba elva ɲanna vaci shairiya. ⁴⁹ Adaba elva á ire-aaruwa ka. Baɗemme á názena yá aɲkwa ndaater ge emnde, antara názena ni yá

anƙwa kwaraterse ge emnde na wá, bademme ndza a binaa ba Edderwa. ⁵⁰ Diyandiya ganakini elva ñanna a beliya Edderwa an ñane na wá, á saterá shifa na á zleka na ge emnde. Daaci bademme ya se ndá ba názena ni a binaa Edderwa.»

13

Yaisu á baraterá sera ge pukura-aha-aara

¹ Ay, a jauwaa ba háre palle mazla-aara tá gya munri á *Paska, Yaisu diyaadiya ganakini herzhavteherzhe sarte-aara jipu ge zlala á dem mba á Eddenjara, á yá duniya. Wayatertewáyá an tsáká ire emnde-aara na ni á yaterá am duniya na.

² Daaci, tá arge masane tara Yaisu an-tara pukura-aha maa, Yahuda egdza á Simaun Iskariyaut wá, fanemfa Shaitaine am ervaunƙe zlauzle, ganakini a veluvele Yaisu. ³ Yaisu wá, diyaadiya ñane ganakini ndza a sawa áza Dadaamiya, watse á eptsa zlaƙe ádaliye á deza Dadaamiya. Diyaadiya geni bademme á hákuma á ba am erva-aara.

⁴ Daaci a naba tsanvaare ge masane na, a tsekweise am zane-aara, anƙwa patele áhuwa a halante, a ñgudese huƙe an ñane, ⁵ a kevaa yawe am tasa, daaci a fantau ge barateraa sera ge pukura-aha-aara, á halateraa yawe áte sera an we á patele na a ñgudese huƙe an ñane na.

⁶ Daada áte Simaun Piyer maa, «Lyafka,» a ba ñane. «Ka ni ka bariya sera ge iya Yaakadada?»

⁷ A ñwanante ge Yaisu, a ba ñane á elvan ge

ɲane: «Názena yá aɲkwa maganá ya na diyaɲka emtsaafe, amá watse ká diyeddiye.» ⁸ A ba Piyer: «Baaka, ká báreka sera-aaruwa dekiɲeki.» A ba Yaisu á elvan ge ɲane: «Máki baranakaaka sera wá, ba icevice dágave á miya antara ka.» ⁹ A ba Piyer á elvan ge ɲane: «Yaakadada, máki estuwa wá, serka palle, antara ba erva-aha-aaruwa, antara ire-aaruwa, náwa barivebare.» ¹⁰ A ba Yaisu á elvan ge ɲane: «Máki ura barevbare wá, á bareka mazla-aara adaba tseɲaɲɲe vuwa-aara. Sey á bára ba sera. Kure wá, tseɲaɲɲe vuwa á kure. Amá wá, kure baɲemme ka.» ¹¹ Edda una ni watse á de vela Yaisu na wá, Yaisu diyaadiya, a ndaanaa adaba una ɲanna: Baɲemme á kureka kwa tseɲaɲɲe.

¹² Am sarte na zlauzle am baratera sera maa, a tsekweme am zane-aara zlaɲe adaliye, a de njehe am tate á nja-aara, a ba ɲane á elvan ge itare: «Kina diyakurdiya názena ya magakurnaa ya na emtu?» ¹³ Náwa kwá ɲahiyá an malum antara Yaakadada. Shagera jipu, una ɲanna ba unɲule-aara. Adaba ba jire ya ba estuwa. ¹⁴ Iya na ya malum antara Yaakadada ni náwa ya barakuraa sera ge kure na wá, daaci kure keni shagera baraubára sera-aha á kure am dagáve á kure. ¹⁵ Iya wá, maranakuránmára gáráva-aara, geni kure keni kwá de magáná á ba áte una ya magakurnaa ya na. ¹⁶ Náwa yá ndakurndá kwa adaliye: Ge jirire wá, walaadi á januka ge zánwe-aara, slebela keni á januka ge edda una ni a eɲbela na. ¹⁷ Kina wá, cenakuráncena mazla-aara, máki kwa emmága áte una ɲanna wá, á de jakurja geɲa.

¹⁸ «Elva-aaruwa na wá, yá ndaakur ge kure bademme á kure ka. Diyanaterdiya ya emnde-aaruwa na ya dzeratersaa ya. Názena ni an puwa am wakita á Dadaamiya na keni shagera ba a gevge. Adaba a ba ñane: Palle á emnde na ña zu dafa kerde á de gev kelaade-aaruwa. ¹⁹ Ndaanakursendá ya mázla-aara, a njinja am vuwa á kure, geni má sámša duksa ñanna wá, kwá diyeddiye geni iya wá, Iya. ²⁰ Yá ndaakur ba jirire: Ma a lyiyanaa ware slebela-aaruwa keni, edda-aara a lyevaa ba iya. Iyau, edda una a lyevaa ya maa, a lyevaa ba edda una ni a belibela na.»

Ngyanmengye Shaitaine am ervaunde ge Yahuda
(*Mat. 26:20-25; Mark. 14:17-21; Luka 22:21-23*)

²¹ Ba a ndaase una ñanna Yaisu wá, mázla-aara damda dzámá ire yaikke á dem ñane. A ba ñane á elvan ge pukura-aha-aara: «Yá ndaakur ba jirire, watse á veliya ba palle á kure.»

²² Farantaufe pukura-aha ge zháráva á dem ice am dágave-aatare, diyarka edda una Yaisu á bálá nákwá áte ñane na dekideki. ²³ Ankwa pukura palle, ñane a nja herzhe an Yaisu, Yaisu a wayete ñane kwakya-aara. ²⁴ Simaun Piyer a maganaa nalaama, geni a ndavanundave: á bálá nákwá áte ware ñane. ²⁵ Pukura ñanna a naba ndavanu ge Yaisu an enkale, a ba ñane: «Yaakadada, ware ñane edda-aara?» ²⁶ A ba Yaisu á elvan ge ñane: «Kwaye watse yá ukcevaukca vanɗwala yá gar dále wá, edda una má ya fanem am erva na ba ñane.»

Daaci Yaisu a naba ukcevaa vanɗwala na, a gar dále, a vante ge Yahuda egdza á Simaun Iskariyaut. ²⁷ Ba a lyevaa dafa na Yahuda am erva á Yaisu wá, Shaitaine a naba ngyanme am ervaunɗe. A ba Yaisu á elvan ge nane: «Ábi ká am niya á nã ge slera á nã na? Edduwa emmága watsewatse.»

²⁸ Amá ma a bannaa adaba uwe Yaisu elva nanna ge Yahuda keni, palle á ura diyaadiya baaka defideki am dagave-aatare nanna. ²⁹ Adaba á náná Yahuda shunɗu maa, emnde umele-aatare ta kurken Yaisu a banaa de shekwamiveshekwe duksa na mí maga munɗi an nane, bi a banaa de tegatertega egdza duksa ge talága-aha. ³⁰ Am sarte na lyevaalya Yahuda vanɗwala na am erva á Yaisu, antara ba degashe-aara ba watsewatse. Am sarte nanna vayiya.

Shairiya anwaslire na a vatertaa Yaisu ge emnde-aara

³¹ Sesse Yahuda zlazlálá maa, a ba Yaisu: «Kina wá, á de marapsemará yaikkire á *Ura á emnde bademme mázla-aara, tá de zharaná áte nane emnde yaikkire á Dadaamiya keni. ³² Ba seke una ni marapsemará yaikkire á Dadaamiya áte Egdza-aara na wá, Dadaamiya keni á de marateránmára ba nane an ire-aara yaikkire á Egdza-aara ge emnde. Á de magán ba herzhe na duksa nanna, má watse á dáná á dem samaya. ³³ Daaci, yá haraaka antara kure kwakya mazla-aara egdzara-aaruwa. Kina wá, názena ndza ya ndaater ge Yahudiya-aha na, yá ndakurnda ge kure keni: Watse kwá tatayitátaya, amá kwá taa daaka á dem tate na yá detekwa ya

na. ³⁴ Náwa shairiya anwaslire yá vakurte ya: Shairiya nanna wá, mága wáyávire am dágave á kure. Kure keni wayawaavewáye am dágave á kure á ba áte una ya wayakurtaa ya na. ³⁵ Máki kwá ankwa wayaavewáye wá, tá naba diyakurreddiye emnde a duniya ganakini kure wá, kwa pukura-aha-aaruwa.»

Piyer á de pelaará we ge Yaisu

(Mat. 26:31-35; Mark. 14:27-31; Luka 22:31-34)

³⁶ A ndavanu ge Simaun Piyer, a ba nane: «Ká zlála a deme ka Yaakadada?» A nwanante ge Yaisu, a ba nane á elvan ge nane: «Kina zlabé ká dzegwánka emtsaade d'abiyá á dem tate na yá detekwa ya, sey watse ká d'abiyá á katafke.» ³⁷ A ba Piyer á elvan ge nane: «Yaakadada labára yá dzegwánka d'abakd'aba kina? Ya keni yá am niya-aaruwa, yá kátá ya shifa-aaruwa ad'aba ka.» ³⁸ A ba Yaisu á elvan ge nane: «Ba jirire ká am niya a ya shifa á na ad'aba ya emtu? Yá ndak ba jirire: Vatena lauktu á kyuwa tsákála wá, ká de ndaasendá ka ser keye, diyakika, a ba ka.»

14

Ba Yaisu palle una baráma á deza Dadaamiya

¹ A ba Yaisu á elvan ge pukura-aha-aara: «A gazleka ervaunđe á kure dekideki, fautarfe áte Dadaamiya, fautarfe áte ya keni. ² Kwakya slede am huđe á há á Edderwa. Ma andze baaka wá, ma yá ndakurka. Yá zlála, yá de tsatsakurá slede. ³ Má tsatsanakuraatsatse slede zlauzle maa, watse yá eptsa, yá se halakurá á dezerwa,

geni kure keni kwá de njá á ba am tate na ni yá njá ya átekwa. ⁴ Baráma á dem tate na yá detekwa ya wá, diyakurdiya.»

⁵ A ba Taumas á elvan ge ñane: «Yaakadada, ba tate na ká detekwa ñanna keni diyañerka ni, diyañerdiya baráma-aara? Njá dise estara kena?» ⁶ A ba Yaisu á elvan ge ñane: «Ya baráma ñanna ba iya, jirire keni á ba ázerwa palle, shifa keni á ba ázerwa palle. Baaka ura á daada á deza Edderwa á kya baráma umele ðekideki, sey máki a se ðaba ya. ⁷ Máki diyakuridiya iya wá, Edderwa keni ba diyakurdiya. Ba kina keni diyakurdiya, kwá añkwa zhára ba ñane.»

⁸ A ba Filip á elvan ge ñane: «Yaakadada, marañeránmára ka ba Edeña na ge ñere wá, zlauzle náza á ñere.»

⁹ A ba Yaisu á elvan ge ñane: «Kinekineka yá am dágave á kure ni kwaasau diyakika Filip? Ma a niyaa ware keni, edda-aara a naa ba Edderwa, una ni marañeránmára Edeña, á ba ka? ¹⁰ Emtu faktarka ganakini yá añkwa am Edderwa, Edderwa keni añkwa am ya emtu? Baðemme á názena yá bakurná ya na elva á ire-aaruwa ka, á bina ba Edderwa. Zlaþe áðaliye baðemme á názena yá maganá ya na keni, á maganá ba ñane slera-aara am ya. ¹¹ Máki ya bakurnaa ba ya: Yá añkwa am Edderwa, Edderwa keni añkwa am iya wá, naba fautarfe. Máki una ka maa, fautarfe kure á ba áte slera-aha na yá maganá ya na. ¹² Yá ndaakur ba jirire: Ma a fetaara ware áte ya keni, ba kelaa názena yá maganá ya na, edda-aara keni á emmága.»

Jauje ba ge una yá anƙwa á maganá ya na keni á de emmága ɗane, adaba yá anƙwa duwa ya ádetevge Edderwa. ¹³ Ma kwa yeka uwe an zhera-aaruwa keni yá emmága, geni a naránna emnde yaikkire á Edderwa adaba Egdza-aara. ¹⁴ Máki kwá ɗala duksa an zhera-aaruwa wá, ma uwe keni yá emmága.»

A ba Yaisu watse á bela Shedekwe Cudedde á sawa

¹⁵ A ba Yaisu á elvan ge itare zlaɓe adaliye: «Máki wayakuriwayá wá, magaumága názena yá bakurná ya. ¹⁶ Iya wá, yá de ɗala Edderwa, ganakini á belakurá ura umele, á se melakurwa ɗane. Edda-aara ɗanna wá, Shedekwe na á kwaraterse jirire ge emnde na, á se njá ɗane antara kure ma vaatara keni. ¹⁷ Emnde a duniya wá, itare tá shánka Shedekwe ɗanna dekiɗeki, adaba diyarka Shedekwe ɗanna, tá nánka keni. Amá kure wá, diyakurdiya ɗane adaba á njá antara kure, watse á njá am kure. ¹⁸ Amaana yá yakurka an ire á kure ba seke egdzar tahe-aha, sey yá sawa ásezekure. ¹⁹ Á katafke cekwaangudi wá, tá de nika emnde a duniya mázle-aara, amá kure wá, watse kwá nina yá á ba an shifa-aaruwa. Adaba una ɗanna, kure keni kwá de shá shifa jirire. ²⁰ Watse kwá de dise ba vacite ɗanna ganakini ɗere an Edderwa wá, ɗa ba palle. Kure antara ya keni ma ba palle.

²¹ «Ma a ɗanaa ware názena ya bakurnaa ya na, anƙwa á emmága, edda una wayiwáyá ba ɗane. ɗere an Edderwa wayaɗerwáya jipu an

edda-aara, yá maranánmára ire-aaruwa ge edda-aara.»

²² Anƙwa Yahuda umele ɲane Yahuda á Iskari-aut ka, a ba ɲane á elvan ge Yaisu: «Yaakadada, á geva estara kena ni, ká de maraɲerá ire á ɲa ba ge ɲere, tá naɲka emnde a duniya na?»

²³ A ba Yaisu á elvan ge ɲane: «Máki wayitewáyá edda-aara, anƙwa á magá názená yá bakurná ya wá, Edderwa keni á wayetewaya edda-aara. Daaci ɲere an Edderwa ɲá de njá an edda-aara. ²⁴ Máki wayika edda-aara wá, názena yá anƙwa bakurná ya na keni a maɲka ɗekiɗeki. Amá a viyakurarka ganakini baɗemme á elva na yá bakurná ya na wá, elva á ire-aaruwa ka, a bina ba Edderwa na ni a belibela na. ²⁵ Yá anƙwa á bakurná ya elva-aha ɲanna aɗaba zlaɓe yá anƙwa antara kure emtsaade. ²⁶ Má zlananzlálá iya wá, watse Edderwa á belakurá Shedeƙwe Cuɗeɗe slemelanu ge ura á de sawa an zhera-aaruwa. Má watse samsa ɲane wá, á se kwarakurse duksa baɗemme, á se yehakuranta ɲane názena ya bakurnaa ya na baɗemme.

²⁷ «Kina wá, yá zlálá, náwa yá yakurá hairire. Hairire-aaruwa ɲanna wá, gergere antara hairire na á vantá duniya ge ura. Yá vakurte ba hairire na yá an ɲane ya am er-vaunɗe-aaruwa. Daaci a gazleka ervaunɗe á kure ɗekiɗeki, dzamauka ire keni. ²⁸ Ábi kwa cenancena elva-aaruwa, a ba ya ma zlananzlálá keni watse yá eptsa zlaɓe áɗaliye ásezekure. Wayakuriwáyá tsawe wá, higauhiga áte zlálá-aaruwa keni, aɗaba yá anƙwa zlálá á dem mbá á Edderwa, yaikke ba Edderwa arge iya. ²⁹ Kina

wá, fanakuremfa duksa-aha ñanna am vuwa geni vacitu má de gevge duksa-aha ñanna wá, kwá de fetarfe áte iya. ³⁰ Yá ndáka elva kwakya mazla-aara, adába ankwá á sawa slekse á duniya na. Amá á kwariyá ñane ka ðekideki, ³¹ á magava una ñanna, ba geni a diyareddiye emnde a duniya, ganakini wayanwáyá an Edderwa, yá maganá á ba áte una a binaa ñane ma uwe keni. Tsawetse mi zlaláwa áhuna!»

15

Ankwá nafa tá ðahaná an inabauhi, ya nafa ñanna, a ba Yaisu

¹ A ba Yaisu: «Ba iya una ya mama á inabauhi á jirire, Edderwa wá, ñane edda á fe á nafa ñanna. ² Daaci bademme á erva-aha na tá áte ya baaka nampire-aatare na, á ðatsaná á ba á dem áhá edda á fe. Á hyahyalaná antara ba erva-aha shagera shagera na keni cekwa cekwa, geni erva-aha ñanna tá yá egdzere ñgeláma. ³ Daaci kure kina wá, kwá an tsaatse, á tsatsakuraa názena ya kwarakursaa ya bademme na. ⁴ Gawevge emnde a nja á ba áte vuwa-aaruwa, iya keni yá njá á ba átevege kure. Erva a nafa máki icaráyica áte mama wá, á taa yeka egdzere mázla-aara. Ba duksa palle ge kure keni, kwá taa maganaaka ba názara keni máki kwa baaka atevege ya.

⁵ «Daaci ya mama á nafa ñanna ba iya, kure kwa erva-aha-aaruwa. Edda una á njá á ba átevege ya, iya keni yá ankwá átevege ñane wá, ñane á magannaamaga námpire ge Dadaamiya. Amá máki kwa baaka átevege iya, ya baaka

átevege kure wá, kwá taa maganaaka ba názara keni. ⁶ Edda una á njá yiyiye an ya wá, á eblyansebelye Dadaamiya ádegashe, ba seke náza erva á nafa na an ica na. Ta eblyanse á degashe, má welesewele tá fante kára. ⁷ Máki kwá nja á ba áte vuwa-aaruwa, elva-aaruwa keni kwá anƙwa emmága wá, naba ndavaundáva názena kwá kataná kure, kwá shánsha. ⁸ Máki anƙwa námpire na kwá maganá kure wá, tá de diyakureddiye emnde ganakini kwa pukura-aha-aaruwa ba jirire, tá de dise estuwa yaikkire á Edderwa keni. ⁹ Yá keni wayanakurwáya ba seke una a wayitaa Edderwa na. Ma vaatara keni diyaweddiye ganakini wayanakurwayire. ¹⁰ Máki kwá anƙwa á fisarfe am názena yá bakurná ya wá, ma vaatara keni kwá diyeddiye ganakini wayanakurwáyá, ba seke una yá anƙwa á fansaara ya ge Edderwa, ma vaatara keni diyandiya geni wayiwáyá Edderwa.

¹¹ «Ya sakuranse una na wá, ganakini a naatená higa-aaruwa na ni yá an ɲane na am ervaunƙe á kure, geni kure keni á natená ervaunƙe á kure an higa ba kalkale antara náza-aaruwa. ¹² Náwa názena yá bakurná ya: Wayawaavewaye am dagave á kure ba seke una ya wayakurtaa ya. ¹³ Máki ba mága wayavire wá, baaka arge una ni ura a naba yaa shifa-aara adaba slakate-aha-aara na. ¹⁴ Daaci kwa slakate-aha-aaruwa ba kure máki kwá anƙwa á maga názena yá bakurná ya. ¹⁵ Daaci estuwa wá, yá dfaakurka an walaadi-aha mázla-aara, adaba walaadi diyaaka sawári na am ire á zánwe-aara. Yá dfaakura á ba an slakate-

aha-aaruwa, adaba shanakurushe sawari na ya shanaa áza Edderwa na bademme ge kure. ¹⁶ Kwa eksisaa kure ka lauktu ya gev Yaakadada á kure, amá ya dzerakursaa ba ya geni kwá se d'abid'aba. Ya fakuraare slera zla'be adaliye, geni kwá maganaamaga nampire na ni saksage na. Daaci ma kwa ndavanu uwe ge Edderwa keni á vakurteva, máki kwá ndavaná an zhera-aaruwa. ¹⁷ Wayawaavewaye am dagave á kure. Ba una názu yá fakuraará ya.»

Duniya yanaaya Yaisu antara emnde-aara

¹⁸ «Máki yarakuraaya emnde a duniya wá, diyaweddiye ganakini ta yaa ba ya zunḡwe. ¹⁹ Ma andze kwa emnde a duniya wá, ma tá yákuraaka emnde-aara keni, adaba ma kwa ba palle. Amá kwa emnde a duniyeka, ya dzerakursaa ya, ya sakurse am itare. Adaba una ḡanna yarakuraaya na. ²⁰ Viyawanaaka kure ba elva-aaruwa na: Walaadi wá, á taa januka ge zanwe-aara an yaikkire. Máki ta faa zla'fa áte ya wá, watse tá fá zla'fa áte kure keni. Máki ta cena elva-aaruwa wá, názá á kure keni watse tá eccena. ²¹ Bademme á lámare ḡanna wá, tá de magakurte adaba ba zhera-aaruwa, adaba diyarka edda una ni a belibela na. ²² Ma andze sanemka á se ndaternda wá, ma haypa-aatare ka. Amá kina wá, watse baaka we-aatare mazla-aara, ba haypa-aatare. ²³ Ma a yiyaa ware keni, a yaa ba Edderwa. ²⁴ Ma andze magannaaka slera-aha na ndza magaaveka am dagave á emndimagwaha dekid'eki na áte ice-aatare wá,

ma haypa-aatareka. Amá náwa naranna slera-aaruwa bademme, aley yaraŋeraaya antara ba Edderwa keni. ²⁵ Mága-aatare ŋanna wá, a gevaa ba názena an puwa am tawrait-aatare. Aŋkwa an puwa am *tawrait, a ba ŋane: Yariyaaya ba dey.»

²⁶ A ba ŋane á elvan ge itare zlaŋe ádalije: «Watse á sawa Slemelakurumele á de vakurtá Edderwa, yá de belaná á sawa am mba á ŋere máki danaada ya. Slemelakurumele ŋanna wá, Shedekwe Cudedŋe á kwaratersá ŋane jirire ge emnde, á se maganá ŋane seydire áte ya. ²⁷ Kure keni watse kwá mága seydire áte ya, adaba ya fantuwa estuwa slera-aaruwa, sem kina ma ba kerde.»

16

¹ «Náwa yá aŋkwa fakuremfa am vuwa á kure, ganakini a de kezlevka fetarfire á kure áte ya. ² Adaba watse tá ŋgyakurŋgye am jeba á Yahudiya ba dekideki, kwá duka á dem mashidi. Aŋkwa á sawa sarte umele wá, ma a janaa ware shifa á kure keni, á de banba am ervaunŋe-aara geni á maganá slera shagera ge Dadaamiya. ³ Una ŋanna tá de maganá adaba diyaraŋerka ma Edderwa, ma iya keni. ⁴ Kwaya ŋane, fanakuremfa am vuwa á kure zlauzle. Daaci má samsa sarte ŋanna wá, watse kwá diyeddiye ganakini ya ndakurndá.»

Slera á Shedekwe Cudedŋe am duniya

A ba ŋane á elvan ge itare: «Ndanakurka una am fantaufe na wá, adaba yá aŋkwa ba ya an ire-aaruwa am dagave á kure. ⁵ Kina wá, ya

ndakursende adaba yá anƙwa eptsá á deza edda una a belibela na. Amá baaka ura a ndaviyu elva am dagave á kure áte zlala-aaruwa nanna. ⁶ Kwá dzámá ire estuwa adaba ya bakuraa yá eptsá ádeza edda una á belibela na emtu? ⁷ Amá yá ndaakur ba jirire: Baira ge kure wá, shagera ba yá zlalá nanna. Adaba máki zlalanka ya, á sawka Slemelakurumele na keni. Amá máki zlalanzlalá ya wá, yá de belá nane, á de sawa nane ásezekure. ⁸ Má watse samsa nane wá, á se weratertá ice ge emnde a duniya áte haypa-aatare, áte jirire-aaruwa antara áte shairiya na á de kyáná Dadaamiya. ⁹ Haypa-aatare nanna wá, adaba fartareka áte ya. ¹⁰ Ate jirire-aaruwa keni maa, adaba watse kwá nika mazla-aara yá eptsá ádeza Edderwa. ¹¹ Ate shairiya á Dadaamiya maa, adaba nateran̄a shairiya antara slekse á duniya na bademme.

¹² «Kwakya duksa na yá kátá bakurná ya, amá yá ndakurka adaba zlaɓe kwá dzegwánka. ¹³ Daaci má watse samsa Shedekwe Cufedfe nanna á kwaranse jirire ge ura na wá, watse á se ndakursá nane jirire á duksa bademme. A se ndaakur elva á ire-aareka, amá á se ndáhá ba názena ni a cenáncena na, antara duksa na watse á magava á katafke na bademme. ¹⁴ Watse á se mbedakurwa nane elva-aaruwa, daaci estuwa emnde bademme watse tá nanna yaikkire-aaruwa. ¹⁵ Bademme á duksa á Edderwa ba náza-aaruwa. Ya bakurnaa adaba una, watse Shedekwe Cufedfe á sakurá elva-aaruwa.»

Dzama ire á de gev higa yaikke

¹⁶ A ba Yaisu á elvan ge itare: «Á de katafke cekwaanḡudī wá, watse kwá nika. Má shekwaashekwa cekwaanḡudī, watse kwá nina zlaḡe ádaliye.» ¹⁷ Daaci a bá pukura-aha umele am dagave-aatare: «A ba Yaakadada, á de katafke cekwaanḡudī wá, watse kwá nika. Má shekwaashekwa cekwaanḡudī wá, watse kwá nina zlaḡe ádaliye. A ba ḡane zlaḡe ádaliye: Yá zlala á dem mbá á Edderwa, watse kwá nika na mu, amaana estara ḡane elva ḡanna?» ¹⁸ A ba itare: «Á de katafke cekwa na á ndaana ḡane na wá, ḡá taa diseka ḡekidēki.»

¹⁹ Amá kertenḡ diyeddiye Yaisu ganakini aḡkwa ndáva-aatare azeḡara. Daaci a ba ḡane á elvan ge itare: «Kwá kátá dise elva-ara ḡane kwá aḡkwa á ndava am dagave á kure na? Ba elva na ya bakurnaa ya, á bá ya: Á de katafke cekwaanḡudī watse kwá nika, má shekwaashekwa cekwaanḡudī, watse kwá nina zlaḡe ádaliye na emtu?» ²⁰ Yá ndaakur ba jirire: Kure wá, watse kwá kyuwa, watse kwá tsákáná á ba antara ḡakwa. Emnde a duniya wá, watse tá dzaka. Watse kwá dzámá ire kwakya, amá cekwaanḡudī á de katafke wá, á de gev higa yaikke ge kure. ²¹ Ba seke náza á mukse á huḡe, máki herzhe yá-aara wá, sey ba á dzámá ire aḡaba herzhe zlaḡa-aara. Amá má yaaya wá, á shá higa yaikke, á gev ba seke ndza wanka duksa, aḡaba yaaya ura. ²² Watse ba duksa palle ge kure keni, kina wá, kwá aḡkwa dzama ire, amá watse yá nakurná zlaḡe ádaliye ba kure ḡanna, kwá higa, watse ḡaaka ura á

dzegwándzegwa piya higa ɲanna am kure.

²³ «Má watse samsa sarte ɲanna wá, bademme á maana á duksa watse á ba bálá ázekure, baaka ura á de ndava elva ázerwa. Yá ndaakur ba jirire: Ma kwa ndava uwe an zhera-aaruwa keni, á vakurteva Edderwa. ²⁴ Zlaɓe ndavakurka emtsaade ba názara keni an zhera-aaruwa. Ndavaundáva, kwá shánsha duksa na kwá ndavaná kure, geni a natena higa am ervaunɗe á kure.»

Yaisu gaaga ndzedɗa arge duniya

²⁵ A ba ɲane á elvan ge itare zlaɓe ádaliye: «Sem vatena wá, yá eksa duksa á duniya ganakini yá palakurá sera á elva á Edderwa an ɲane. Amá aɲkwa á sawa sarte na ni watse yá ndaakur elva á Edderwa ba parakke. ²⁶ Má samsa sarte ɲanna wá, watse kwá ndavaná ba kure an ire á kure duksa áza Edderwa an zhera-aaruwa. Bawanka ni watse yá yekakurná ba iya duksa. ²⁷ Adaba Edderwa wayakurtewáyá kure keni. A wayakurte adaba kure wayakuriwaya, fakurtarfe geni ya sawa ázeɲara. ²⁸ Ba jire ya sawa á ba áza Edderwa, ya sem duniya. Kina wá, yá aɲkwa ya duniya, yá eptsa á deza Edderwa.»

²⁹ A ba pukura-aha-aara: «Yawwaa, una wá, ndaksenda elva párákke, baaka naraje am huɗe-aara ɗekideki. ³⁰ Kina wá, diyaneɗdiya ganakini diyakdiya duksa bademme, diyakdiya ka názu am ire á ɲere, baaka ni ɲá ndavaku an ndave emtsaade. Adaba una ɲanna diyaneɗdiya mázla-aara geni ka sawa áza Dadaamiya.»

³¹ A ba Yaisu á elvan ge itare: «Diyakurdiya mázla-aara ka? ³² Amá aɲkwa á sawa sarte

umele, ba kina keni samsa wá, bademme watse kwá kyivaarkye, ma ware keni watse á zhagade á de cuwa há-aara, watse kwá yiya ba ya palle. Amá ge jirire wá, watse ya palle ka, adaba anƙwa Edderwa antara ya. ³³ Bademme á una ɲanna yá anƙwa fakurem am vuwa na wá, geni a gazleka ervaunde á kure deƙideƙi, adaba kwa ba palle antara ya. Am duniya na wá, kwá shushe zlada, amá tsawaatse ba shagera, adaba gannaaga ya ndzedá arge duniya.»

17

Maduwa á Yaisu arge pukura-aha-aara

¹ Am sarte na zланаazle elva-aara Yaisu, a kante ice á dem samaya, a ba ɲane: «Eddaye-aaruwa, kina wá, hyephye sarte mázla-aara. Marateranmára yaikkire á Egdza á ɲa ge emnde, geni ya keni ya marateranmára yaikkire á ɲa. ² Adaba ka vitaa ba ka hákuma áte emnde bademme, geni yá vaterte shifa na á zleka na, ge emnde na ka dzeratersaa ka ge se dƙabidaba. ³ Shifa na á zleka ɲanna wá, ba ni a diyaraksediya ba shagera, ka Dadaamiya á jirire baaka umele, a diyariyeddiye iya Yaisu *Almasiihu na ka beliyaa ka. ⁴ Maranateránmára yaikkire á ɲa ge emnde am duniya, magannaamaga slera na ni ka fiyaara ka. ⁵ Daaci kina wá, eptsiyaptsa kwa á dem yaikkire-aaruwa na ndza yá am kwa átevege ekka kwaye zlaɓe nderaaveka duksa ba deƙideƙi na.

⁶ «Kwaranatersekwere zhera á ɲa bademme ge emnde na ka dzeratersaa ka am duniya, ka

vite ge dabiɖaba na. Ta emnde á ɲa ba ge ekka, amá ka puwatermaa am erva-aaruwa. Itare wá, tá anƙwa cena elva á ɲa, tá anƙwa á faksarefe. ⁷ Kina wá, itare diyardiya baɖemme ganakini baɖemme á názena ya shanaa ya ázeɲa, a sawa á ba ázeɲa. ⁸ Mbedanaterumbede elva á ɲa baɖemme, lyarvaalya an ervaunɖe-aatare palle, diyardiya ganakini ba jirire ya sawa ázeɲa, fartarefe geni ka beliyaa ba ka.

⁹ «Yá anƙwa ɲaláká aɖaba itare. Yá ɲalák ge duniya baɖemme ka, amá aɖaba emnde na ni ka vite ge ya na. Ta emnde á ɲa ba ge ekka. ¹⁰ Duksa-aaruwa, ba duksa á ɲa. Duksa á ɲa keni ba duksa-aaruwa. Daaci emnde tá zharaná am itare yaikkire-aaruwa. ¹¹ Iya wá, yá anƙwa yá duniya, yá eptsá á dezeɲa, amá itare wá, zlaɓe tá njá á ba am duniya na. Edderwa ka cuɖeɖe, yá anƙwa dá kina á dezeɲa na wá, yá anƙwa ɲalakɲála geni ká tsufatertsufa an hákuma na ni anƙwa am zhera á ɲa, zhera á ɲa na ka vite ge iya na, geni itare keni a garevge palle, ba seke una ni miya antara ka ma ba palle na. ¹² Am sarte na yá anƙwa ya am dagave-aatare wá, tsufanateraatsufa an hákuma na anƙwa am zhera á ɲa, zhera na ka vite ge ya na. Baaka ura keɖaakeda am dagave-aatare, sey ba edda una anƙwa elva-aara ta puwete am wakita á ɲa na. Gevge ba kalkale antara una a ndaanaa wakita. ¹³ Amá kina yá anƙwa tse, yá zlala á dezeɲa na wá, yá anƙwa ndaha elva ɲanna antara ka emtsaade, geni ma zlalanzlala keni, a naatenaha ervaunɖe-aatare an higa ba kalkale antara náza-aaruwa. ¹⁴ Mbedanaterumbede

elva á ña, lyarvaalya an ervaunđe-aatare palle. Amá wayaraterka emnde a duniya mazla-aara, adaba garevge gergere. Ba seke una iya keni ganevka ura á duniya na. ¹⁵ Yá ñalák ganakini ká satersese am duniya bademme ka, amá geni ká tsufatertsufa, a magaterteka emtanƙire slemándzawe. ¹⁶ Ba seke una ni ya ura á duniya ka ya na wá, itare keni ta emnde a duniya ka. ¹⁷ Emmága sleksire á ña am ervaunđe-aatare, barateraabará an jirire á ña. Ba elva á ña una jirire ñanna. ¹⁸ Ba seke una ka beliyaa ka á sawa am samaya, á sem duniya na wá, iya keni yá anƙwa á belaterbela á dem huđe á duniya. ¹⁹ Yá anƙwa vakte ire-aaruwa bademme adaba itare, geni itare keni tá yaká ire-aatare á ba an jirire.

²⁰ «Kina wá, yá ñaláká arge itare ka palle mazla-aara, yá ñaláká arge emnde na ni watse tá de fetaare áte ya adaba waazu-aatare na keni bademme. ²¹ Yá anƙwa ñalakñála Edderwa, geni bademme-aatare ñanna, ká gatervege ba palle, lauktu tá gevge palle antara miya, ba seke una yá anƙwa am ka, ka keni ká anƙwa am ya na. Itare keni a garevge palle, lauktu tá de fetarfe emnde a duniya ganakini ka beliyaa ba ka. ²² Yaikkire na ni ka vitaa ka ge iya na wá, vanaterteva ya ge itare keni, geni a garevge palle, ba seke una miya antara ka ma ba palle na. ²³ Ba seke una ni ekka ká anƙwa am ya, iya keni yá anƙwa am ka na wá, itare keni a garevge ba palle. Á de dise áte una ñanna duniya ganakini ka beliyaa ba ka, wayakaterwáyá itare keni ba seke una ka wayite ya na.

²⁴ «Daaci Edderwa, emnde ɲanna ka vitaa ka na wá, yá kátá itare keni tá de njá á ba am tate na yá de njá ya átekwa na, geni a naránna yaikkire na ka vitaa ka. Yaikkire-aaruwa ɲanna wá, adaba wayakitewáya kwaye zlaɓe nderaaveka duksa ba dekidfeki na. ²⁵ Eddaye-aaruwa, ka ura jirire, amá diyaraɲka emnde a duniya, ya diyaksaa ba ya. Emnde ɲanna ka vitaa ka na keni diyardiya ganakini ka beliyaa ba ka. ²⁶ Kwaranatersekwáre zhera á ɲa ge itare, yá aɲkwa á kwaratersekwáre zlaɓe ádaliye dem katafke keni, ganakini wayava na ka wayitaa ka an ɲane na wá, itare keni tá wayaavewáye á ba áte una ɲanna, iya keni yá ɲjinja am itare.»

18

Ta eksanaa estuwa Yaisu

(*Mat. 26:47-56; Mark. 14:43-50; Luka 22:47-53*)

¹ Am sarte na zланаazle Yaisu mága maduwa ɲanna, mazla-aara ta naba zlála antara pukura-aha-aara á dete iga a egdza guwa na tá d'aaaná an Kaidairaun na. Aɲkwa fe áte iga a guwa ɲanna maa, ta demhe am fe ɲanna antara pukura-aha-aara. ² Yahuda na a velanaa ɲane Yaisu na wá, ɲane diyaadiya tate ɲanna. Adaba mbaasemba Yaisu ge dem tate ɲanna antara pukura-aha-aara. ³ Daaci a dateraa Yahuda ɲanna sawji-aha, antara emnde a ufa mashidi na ta belateraa male-aha á *liman-aha antara *Farisa-aha na. Daaci daredde, tá an kazlaɲa á wáva-aatare am erva, antara kára á fanus-aha-aatare, ira kára á názambakara.

⁴ Yaisu wá, diyaadiya ñane názu watse á shá ñane bademme. A tsetehe, a ba ñane á elvan ge itare: «Kwá anƙwa tatayá ware kure?» ⁵ Ta ñwanante, a ba itare: «Ŋá anƙwa tatayá ba Yaisu ura Nasarátu.» A ba Yaisu á elvan ge itare: «Ya Yaisu ñanna ba iya.» Daaci ta tsaahé kwa, antara Yahuda na a velanaa ñane na á tse á katafke-aatare. ⁶ Am sarte na ni ya Yaisu ñanna ba iya, a ba Yaisu á elvan ge itare na wá, bademme eptsaraapetsa an iganiga, reppe puwaraapuwa á dem áhá bademme.

⁷ Yaisu a ndavateruhe zlaɓe ádaliye: «Kwá anƙwa tatayá ware kure?» Ta ñwanante, a ba itare: «Ŋá anƙwa á tatayá Yaisu ura Nasarátu.»

⁸ A ba Yaisu á elvan ge itare: «Ábi ya ndaakurn-daha? Máki kwá anƙwa á tatayá ba iya wá, yawáterya emnde na a zlarzlálá, ya Yaisu ñanna ba iya.»

⁹ Yaisu a ndaa una ñanna, geni a gevge á ba áte elva-aara na a banán ge Eddenjara Dadaamiya na, adaba a ba ñane: «Ba ura palle keni kedfaaka am dagave á emnde na ka vítaa ka.»

¹⁰ Simaun Piyer maa, anƙwa masalam ázeñara, a naba tedese masalam-aara ñanna, a waa walaadí á male á *liman-aha an ñane, a lanaa hyema á naɗafa. Zhera á walaadí ñanna Malkus. ¹¹ Amá a ba Yaisu á elvan ge Piyer: «Femfa masalam á ña am bere-aara. Ka kurken eksanarka shá zlaɗa na a fiyaara Edderwa emtu?»

Daránda Yaisu á dem mba á Hannas

¹² Daaci ta naba gwarhe ge sawji-aha antara male-aatare ira Yahudiya-aha emnde a ufa mashidi na, ta naba puwete zawa áte Yaisu. ¹³ Zunḡwe wá, ta daa Yaisu á dem mbá á Hannas emtsaáde, shawleḡara ge Kayafas male á *liman-aha am sarte ḡanna. ¹⁴ Ba Kayafas na ndza a baterán ge Yahudiya-aha, a ba ḡane: «Máki jamija shifa-aara ḡane palle, á shansha ire-aara larde á miya na.»

A ba Piyer: Ya pukura á Yaisu ka

(Mat. 26:69-70; Mark. 14:66-68; Luka 22:55-57)

¹⁵ Simaun Piyer antara pukura umele wá, ta daa ḡaba Yaisu am sarte na eksarvaaksa na. Palle á Piyer ḡanna wá, male á *liman-aha diyaadiya ḡane ba shagera. Aḡaba una ḡanna a shaa baráma á ḡaba Yaisu á de ba am huḡe á há á male á liman-aha. ¹⁶ Amá Piyer wá, a tsaáhe áte we á wakyiya. Daaci a naba eptsehe ge pukura palle na diyaadiya male á liman-aha na, ta se ndaave elva antara mukse na á ufa wakyiya na, daaci a dánme Piyer keni á dem huḡe á há. ¹⁷ Mukse ḡanna sle-ufa wakyiya na a se ndavanu ge Piyer, a ba ḡane á elvan ge ḡane: «Ábi ka keni ka ba pukura á zhel ḡanna?» A ḡwete ge Piyer, a ba ḡane: «Iya ka». ¹⁸ Am sarte ḡanna aḡkwa ekhye maa, mbarantembe kára walaadi-aha antara emnde a ufa mashidi, tá aḡkwa á cena kára na. Piyer keni a de tsaáhe ázetare, tá cena kára na kerḡe.

*Yaisu á katafke á Hannas male á *liman-aha werre*

(*Mat. 26:59-66; Mark. 14:55-64; Luka 22:66-71*)

¹⁹ Hannas emgyegwe a male á *liman-aha a ndavanu elva ge Yaisu áte pukura-aha-aara, antara názena a kwaratersaa ñane ge emnde.

²⁰ A ñwanante ge Yaisu, a ba ñane á elvan ge ñane: «Bademme á elva-aaruwa ya ndahán ba párákke. Ya kwaraterse ge emnde am *mashidi yaikke, antara am egdzar mashidi-aha. Baaka elva na ya ndaanaa an shebe defkideki. ²¹ Labara ká ndaviyu elva áte una ñanna? Ndavaterundave ba ge emnde na ni a cenanaa hyema-aatare elva am mbuwe-aaruwa, itare diyaardiya názena ya ndaanaa ya.»

²² Ba a ndaase una ñanna Yaisu wá, palle á emnde a ufa mashidi na tá á tsatse áhuwa, a se vante babárva, a ba ñane á elvan ge Yaisu: «Tá ñwanante ba estuwa ge male á liman-aha?» ²³ A ba Yaisu á elvan ge ñane: «Máki ya ndaanaa an dzálá wá, naba ndaerndaa tate na ni ya ndaanaa an dzálá na. Amá máki ya ndaanaa á ba áte unñule-aara wá, labara ká jija?»

²⁴ Daaci á bá liman Hannas: «Dawánda kwa á dem mba á Kayafas.» Ta daa Yaisu á ba an takwasa ñanna á dem mba á Kayafas male á liman-aha.

Dalide Piyer ge baa ñane pukura á Yaisu ka

(*Mat. 26:71-75; Mark. 14:69-72; Luka 22:58-62*)

²⁵ Am sarte ñanna, zlafe Simaun Piyer á ba tse áte we á kára na, á cena kára. Ta ndavanuhe ge

emnde a cena kárá ñanna, a ba itare tá elvan ge ñane: «Ka keni ka ba palle á pukura-aha á zhel ñanna ka?» A ñwete ge Piyer a ba ñane: «Ya pukura-aara ka.» ²⁶ Anƙwa palle á walaadi-aha á male á *liman-aha, ba egdza emmenjara ge edda una Piyer a icanaa hyema an masalam na, a ba ñane á elvan ge Piyer: «Ka ni nananƙa antara ñane am fe áhuwa na?» ²⁷ «Aley ba ya pukura-aara ka», a ba Piyer. Ba ñane keni ndaasende, tsaktsakwalikwaa a ba tsákálá.

*Yaisu á katafke á sleksu *Pilaatu*

(Mat. 27:1-2, 11-14; Mark. 15:1-5; Luka 23:1-5)

²⁸ An enjlya werre wá, ta danse Yaisu am mbá á Kayafas male á *liman-aha, ta dánaa á dem mbá á *Pilaatu slekse yaikke ta fanaa emnde a Rauma. Amá darka Yahudiya-aha á dem huđe á há á slekse ñanna, adaba tá an bára cuƙeƙe, anƙwa muƙri á *Paska á katafke-aatare geni tá shánsha zá muƙri ñanna. ²⁹ A segashe adaba una ñanna sleksu Pilaatu ásezetare ágashe, a ba ñane á elvan ge itare: «Kwa se puwaar ugje adaba uwe ge zhel na?»

³⁰ Ta ñwanante ge slekse, a ba itare: «Ma andze baaka názu á maganá ñane wá, ma ñá sánka á sem mbá á ña.» ³¹ A ba sleksu Pilaatu á elvan ge itare: «Máki ba estuwa wá, nawmbare dawánda, de kyawkya ba kure shairiya-aara áte una am *tawraita á kure.» Ta ñwanante ge male-aha á Yahudiya-aha, a ba itare tá elvan ge ñane: «Adaba baaka baráma-aara ge ñere, ganakini ñá kyá shairiya a keđa shifa á ura.»

³² Mága ñanna wá, sesse jirire á elva á Yaisu na

a ndaanaa áte emtsa-aara na. Adaba a ba ñane: Watse tá tsitetse áte dzaŋgala.

³³ *Pilaatu a naba demhe am huđe á há-aara, a daante Yaisu, a de ndavanuhe, a ba ñane á elvan ge ñane: «Ba ka una ka slekse á Yahudiya-aha na emtu?» ³⁴ A ba Yaisu á elvan ge ñane: «Una ba elva á ire á ña emtu, ta se ndaaka emnde he?» ³⁵ A ba Pilaatu á elvan ge Yaisu: «Iya ya ura Yahudiya emtu? Ábi ta se puwakaare ugje ba emnde á kure antara male-aha á *liman-aha ázerwa, ka gu uwe ka?»

³⁶ A ñwanante ge Yaisu, a ba ñane á elvan ge ñane: «Ya slekse, amá kwárá-aaruwa wá, am duniya ka. Ma andze tate na yá kwaraná ya am duniya wá, ma tá sawa kwakwane-aha-aaruwa á se waviyuwawe, ma tá eksivaaka Yahudiya-aha dekideki. Amá tate na ni yá kwaraná ya na wá, am duniya ka.» ³⁷ A ba Pilaatu á elvan ge ñane: «Máki estuwa wá, ka slekse kwa?» A ba Yaisu á elvan ge ñane: «Ba seke ndáhá ña. Ya slekse. Dalila á sawa-aaruwa á sem duniya na wá, a siyaa ba se maratera jirire ge emnde. Ta yiyaa adaba ba una ñanna. Edda una aŋkwa jirire ázeŋara wá, á cená elva-aaruwa keni.» ³⁸ A ba Pilaatu á elvan ge ñane: «Uwe ñane jirire ñanna?»

Am iga-aara maa, a naba sessehe zlađe ádaliye ge Pilaatu ñanna áseza Yahudiya-aha na ágashe, a ba ñane á elvan ge itare: «Shanáka ya haypa áte zhel na ba palle keni. ³⁹ Am mbakurseembe ganakini ba kelaa sakanderi yá belakurá danğay palle am muŋri á *Paska maa, wayakurwáya emtu an slekse á Yahudiya-aha

yá belakurnaabela á da?»⁴⁰ Amá a ba itare bademme-aatare tá elvan ge ñane á bá an ká kwará: «A'aa ñane ka, belanaaka ñane. Nere ñá hayá ká belañerá Barabas.» Degiya Barabas ñanna sleceba shifa.

19

*Njarantenja am shairiya ge ja shifa á Yaisu
(Mat. 27:15-31; Mark. 15:6-20; Luka 23:13-25)*

¹ Daaci a ba slekse á elvan ge sawji-aha-aara: «Dawánda Yaisu, de zawuze an ja.»² Ta dánhe ge sawji-aha Yaisu na, ta de nderse dáke, ta fadanse ire an ñane, ákurá *dãnkaula, ta tsekwanme am dira kyaññe.³ Mazla-aara ta tsaahé ákatafke-aara, ta gyanu rume: «A vak-teva Dadaamiya shifa slekse á Yahudiya-aha!» Daaci ta naba vavante babárva.

⁴ Am iga-aara maa, sleksu *Pilaatu sesse zlahe ádaliye áseza zlamaakelaawa, a ba ñane á elvan ge itare: «Kwaye yá de sansese zhel ñanna á se katafke á kure, ba palle keni shanáka ya haypa-aara, ganakini yá ñgudaná adaba ñane.»

⁵ Daaci ta sanse Yaisu ásegashe wá, an tsekwa am dira kyaññe, ta fadanse ire an dake. A ba slekse á elvan ge itare: «Kwaya ñane zhel ñanna.»⁶ Aley ba ta puwete ice-aatare áte Yaisu, *liman-aha antara emnde a ufa mashidi wá, ta kante kwara á ba á dem zhegela, a ba itare tá elvan ge slekse: Zleñelezleñela áte dzangala. Bademme-aatare tá ndaha ba ñane. «Áy nánwmbare de zleñelawzleñela ba kure áte dzangala ñanna, shanáka ya haypa na ni yá

zlejelaná adaba nane.» ⁷ A ba Yahudiya tá elvan ge nane: «Máki áte shairiya na am *tawraitá á nere wá, á njeka an shifa dekideki, adaba a bantsa nane: nane *Egdza á Dadaamiya.»

⁸ Am sarte na cenáncena sleksu *Pilaatu, a ba Yaisu nane Egdza á Dadaamiya na wá, farfe zlahe adaliye gázla-aara. ⁹ A eptsehe zlahe adaliye á dem huđe á há, a de ndavanu ge Yaisu, a ba nane á elvan ge nane: «Ka ura ekse-ara ka?» Amá nwanárka Yaisu dekideki. ¹⁰ A ba slekse á elvan ge nane: «Ká nweka ndza? Diyakika ganakini yá an hákuma ge belakaabela, bi ya zlejelakhe áte dzangala emtu?» ¹¹ A ba Yaisu á elvan ge slekse: «Hákuma nanna ká maganá ka áte ya na keni a vaktaa ba Dadaamiya. Ma andze vakteka Dadaamiya wá, ma baaka hákuma á na áte ya ba cekwaangudí keni. Daaci kwakya ba haypa á edda una a se vite ge ekka na arge haypa á na.»

¹² A fantau á ba am sarte nanna slekse, baaka názu magaaka ganakini á belanaabela Yaisu. Amá ta puwaar hula Yahudiya-aha, a ba itare tá elvan ge nane am hula-aatare: «Máki belakanaabela zhel na wá, ka ura á male á larde a Rauma ka dekideki. Adaba ura ni a ganve ire-aara slekse na wá, nane kelaade á male á haha á Rauma.»

¹³ Ba a cenaa elva nanna sleksu *Pilaatu wá, a naba sanse Yaisu adaliye, a njema am kurshi á shairiya áte egdza gavaye-aara ta maganaa án nákwá, an elva á Ibraninƙau tá dahaná an Gabbata. ¹⁴ Am sarte nanna wá, herzhe á maga vacitire. Ba makuralla-aara una muƙri á *Paska.

Daaci a ba sleksu *Pilaatu á elvan ge Yahudiya-aha: «Náwa slekse á kure». ¹⁵ Amá a ba itare á bá an ká kwara á dem samaya: «A njeka an shifa! A njeka an shifa! Zlenjelezlenela áte dzaᅅgala», a ba itare. A ba slekse á elvan ge itare: «Yá já slekse á kure emtu?» A ba male-aha á Yahudiya-aha tá elvan ge ᅅane: «Baaka slekse á ᅅere umele arge male á larde á Rauma.» ¹⁶ Daaci slekse a naba yateraa Yaisu, ganakini a de zlenjelarzlenela áte dzaᅅgala, ta danhe ge sawji-aha.

Zlenjelarzlenela Yaisu áte dzaᅅgala

(*Mat. 27:32-44; Mark. 15:21-32; Luka 23:26-43*)

¹⁷ Daaci daransede Yaisu á dete iga a ekse, a sepanaa ba ᅅane dzaᅅgala-aara á dem tate na tá dāaná an Gaulgauta an elva a Ibraniᅅkau-aha na, amaana: Tate á delame á ire. ¹⁸ Daraada áhuwa maa, sawji-aha na ta naba zlenjela Yaisu áte dzaᅅgala. Anᅅkwa zala buwa ta zlenjelaterhe kerde. Palle ta zlenjelehe áte dzaᅅgala am nadafa á Yaisu, ura palle keni am názlaᅅa, Yaisu am dagave, ma ware keni áte dzaᅅgala ge ire-aara. ¹⁹ Sleksu *Pilaatu a puwete názena ni ta jaa Yaisu átuge na, a fete áte dzaᅅgala. Náwa názena a puwetaa ᅅane: Yaisu ura Nasarátu, ᅅane slekse á Yahudiya-aha. ²⁰ Kwakya Yahudiya-aha na de ndarsende puwa ᅅanna, adaba yiyiyeka an kevaye an berni. Puwa ᅅanna keni ta puwete an elva a Ibraniᅅkau, an elva a Yunaniᅅkau, ira elva a Rauma. ²¹ Amá a ba male-aha á Yahudiya-aha

tá elvan ge sleksu Pilaatu: «Puweka slekse á Yahudiya-aha na, puwetepuwa: A bantsa ñane ya slekse á Yahudiya-aha.» ²² Amá a ba slekse á elvan ge itare: «Názu puwantepuwa wá, á njá á ba áte una ñanna.»

²³ Sawji-aha am sarte na zlaruzle am zlenela Yaisu maa, ta tegaa nanjyuwe-aara am dagave-aatare gergere ufade áte itare. Daaci a juwa zane-aara icarka an ica ðekidfekei, ta hán ba estuwa. ²⁴ A ba sawji-aha am dagave-aatare: «Tataumika zane na, magaumimága njeri, watse á jesarje edda una á zaná ñane na.» Daaci estuwa, gevge ba seke una an puwa am wakita á Dadaamiya. A ba wakita á Dadaamiya wá: Ta tegaa nanjyuwe-aaruwa am dagave-aatare, ta magaa njeri áte zane-aaruwa.

²⁵ Tara emmeñara antara egdza emmeñara mukse ge emmeñara ñanna, antara Maari mukse á Kaulaupas, ira Maari mukse na am Magdala na, itare tá á tsatse á ba áte vuwa á dzañgala na Yaisu átekwa na. ²⁶ Yaisu a belanu ice ge emmeñara, tá antara pukura-aara na ni kwakya-aara a wayete ba ñane na, a ba ñane á elvan ge emmeñara: «Emmaaye, dawale ñanna wá, egdza á ña ba ñane.» ²⁷ A ba ñane á elvan ge pukura ñanna: «Emmeña ba ñane.» Pukura ñanna a naba eksante Maari á ba am sarte ñanna, a danaahe á dem mba-aara.

Emtsa á Yaisu
(*Mat. 27:45-56; Mark. 15:33-41; Luka 23:44-49*)

²⁸ Am iga a una ɲanna maa, am diyaadiya Yaisu ganakini zlauzle slera-aara bademme, a ba ɲane: «Á wiya ndera.» Estuwa gevge názena a ndahanaa wakita á Dadaamiya. ²⁹ Daaci anƙwa hwámá ta netaa mbazla á egdza nafa am hude-aara ɗanɗanje mbazla ɲanna; duwa á sawji-aha, ta ɲgudfete jeba á sausau umele áte lálá, ta shebeme am mbazla ɲanna, ta fante áte we ge Yaisu. ³⁰ Ba a shu una ɲanna Yaisu, a ba ɲane: «Kina wá, zlauzle slera-aaruwa bademme.» Mazla-aara a naba gá ire-aara, a emtsehe.

Zhel sawji a waa Yaisu an upa am slerpa

³¹ Vacite ɲanna maa, makuralla-aara kwaskwe á puwansepuwe á Yahudiya-aha, kwaskwe á puwansepuwe ɲanna keni jauje ge kwaskwe á puwansepuwe-aha umele, adaba munri á *Paska. Adaba una ɲanna wayarka male-aha á Yahudiya ganakini kwaskwe á puwansepuwe á se berá emtsa á emnde áte dzaŋgala. A deteraa una ɲanna á deza sleksu *Pilaatu, geni a kazlaratervekazla emnde na am sera, a tsek-warateraatekwa áte dzaŋgala-aha.

³² Daaci duwa á sawji-aha, ta de kazlaa emnde buwa na ta zlenjelateraa antara Yaisu áte dzaŋgala na am sera. ³³ Amá Yaisu wá, ta beraa baaka shifa am ɲane. Adaba una ɲanna kezlarka sera-aara ge ɲane. ³⁴ Amá palle á sawji-aha a naba wehe an upa am slerpa wá, kerten a kelaa uzhe antara yawe ásegashe. ³⁵ Una a ndaanaa ba edda una a naanaa an ice-aara. Anƙwa á maga seydire-aara ganakini ba jirire.

Ŋane wá, diyaadiya ganakini a geva ba estuwa ba jirire, geni kure keni kwá fetarfe.

³⁶ Una ŋanna gevge ba kalkale antara una an puwa am wakita: A ba wakita á Dadaamiya wá: Tá de kyabeka hyahya-aara dekideki. ³⁷ Am tate umele zlaɓe ádaliye á ba am wakita á Dadaamiya ŋanna, a ba ŋane: Watse tá zhárá edda una ni ta wanaa an upa na.

Zlavarnaazlava Yaisu am irekhya

(*Mat. 27:57-61; Mark. 15:42-47; Luka 23:50-56*)

³⁸ Am iga á una ŋanna maa, aŋkwa Yusufa umele ura Arimatiya, a de ndavanaa ŋane barama áza sleksu *Pilaatu, ganakini á tsek-wanaatsekwa emtsa á Yaisu, á dándá. Yusufa ŋanna wá, fetarfe áte Yaisu, amá ndahaaka parakke adaba á wáná lyawa átuge Yahudiya-aha. A duwa ŋane ádeza slekse, slekse a vante barama. Daaci a de eksantaa ŋane emtsa á Yaisu. ³⁹ Nikaudaimus na ndza a deza Yaisu vacite umele an vayiya na keni aŋkwa áza Yusufa ŋanna. Nikaudaimus a duwa antara naavawe á nafa umele tá dahaná an Mirt, a weshaterte antara iga a nafa umele tá dahaná an Alauwe á se emtáke, á maga kilau kul keye.

⁴⁰ Ta tsekwanaa itare ta buwa ŋanna emtsa á Yaisu áte dzanɓala, ta eksante, ta de fademe am kalpakane. Tá effádá ŋanna wá, ta gete emtsaade naavawe á názase na áte kalpakane, lauktu ta fademe emtsa am huɗe-aara, ta magán ba seke una tá maganá Yahudiya-aha má tá heɗa ura. ⁴¹ Aŋkwa fe ba herzhe an tate á zleŋela á Yaisu ŋanna maa, aŋkwa irekhya aŋwaslire

ndza zlavarnaaka emtsa am huɗe-aara ɗekiɗeki.
⁴² Am makuralla-aara kwaskwe á puwansepuwe-
 aatare, irekhya keni anƙwa ba herzhe na wá, ta
 naba heɗfaa Yaisu am huɗe-aara, aɗaba herzhe
 tá de maga niya á Yahudiya-aha.

20

Baaka Yaisu am irekhya

(Mat. 28:1-8; Mark. 16:1-8; Luka 24:1-12)

¹ An enlya werre ge laade, zlaɓe ba ice keni á zháreka wá, dedde Maari mukse á emnde a Magdala á dete irekhya á Yaisu. Duwa á Maari maa, a de beraa irekya á ba an wacene ɓaaka páláme átuge evege. ² Daaci ba eptsa-aara, a zhágade á deza tara Piyer antara pukura na wayaawáyá Yaisu kwakya na, a ba ɲane á elvan ge itare: «Degiya tedarsetede Yaakadada am evege, ma ta dánaa á deme keni diyaɲerka.» ³ Ta naba duhe ge tara Piyer antara pukura ɲanna á dete irekhya. ⁴ Bukerɗe-aatare ta dá á ba zhagade. Amá á tedáná ba pukura palle na zhágade arge Piyer, daada ba ɲane zuɲɲwe áte irekhya. ⁵ A de zharaa ice á dem irekhya wá, a naa ba kalpákane á puwa ba dey. Amá wá, daaka á dem huɗe á irekhya. ⁶ Dámɗa Piyer keni, ɲane a naba demhe á ba dem huɗe-aara, amá ɲane keni a de beraa ba kalpakane á puwa. ⁷ Amá baukta na ndza ta faɗanaa ire an ɲane na wá, an kazla, á bela á ba an ire-aara. ⁸ Daaci a naba demhe ge pukura na ni ndza a deme ba ɲane zuɲɲwe á dete irekhya na, a zharanaahe, a naba fetarehe ganakini tsetsa Yaakadada. ⁹ Se

ba am sarte ɲanna keni ndza cenaránka pukura-aha názena a ndahanaa wakita á Dadaamiya áte Yaisu, ganakini watse á tsetse am faya na. ¹⁰ Daaci ta naba dá-aatare ge pukura-aha buwa ɲanna.

Yaisu a maranse ire-aara ge Maari mukse á emnde a Magdala

(Mat. 28:9-10; Mark. 11:9-11)

¹¹ Am sarte ɲanna wá, eptsapetsa Maari zlaɓe ádaliye á sete we á irekhya. A tsaahé wá, á kyuwa. Duwa-aara á de zharáa ice á dem irekhya wá, ¹² á zhárá ba malika-aha ta buwa, tá am nanɣyuwe dzayye dzayye, tá njanja am tate na ndza ta zlavaa Yaisu na. Palle á malika-aha ɲanna a nja am tate á bela ire, palle keni ám tate á sera. ¹³ Daaci ta ndavanu elva malika-aha ɲanna: «Labara ká kyuwa emmaaye?», a ba itare tá elvan ge ɲane. A ɲwaterante, a ba ɲane: «Ya kyuwa Yaakadada-aaruwa, ma ta danaa á deme keni diyanka.»

¹⁴ Ba a ndaase una ɲanna, estuwa a eptsetaa ice wá, á zhárá ba Yaisu á tse, amá wá, diyaaka ganakini una ɲane. ¹⁵ A ba Yaisu á elvan ge ɲane: «Ká kyuwa uwe ka emmaaye? Ká tatayá ware ka?» Maari, ɲane a kurken ba edda una á maga slera am fe. Daaci a ba ɲane á elvan ge ɲane: «Máki ka danaa ka wá, tasle á ɲa biyanba tate-aara eddaaye, yá de eksanteksa.»

¹⁶ «Maari!» a ba Yaisu á elvan ge ɲane. A eptsaptse ge Maari á dezeńara: «Rabbuni,» a ba ɲane á elvan ge ɲane an elva a Ibraniŋkau, amaana malum-aaruwa.

¹⁷ A ba Yaisu á elvan ge ñane: «Piyiyanteka, adaba zlaɓe zlalanka emtsaade á dem mba á Edderwa. Amá ezzlala de bateránba ge egdzar mama-aha-aaruwa: Náwa tsanetse, watse yá zlálá á deza Edderwa, kure keni Eddekure ba ñane, yá deza Dadaamiya-aaruwa, kure keni Dadaamiya á kure ba ñane.»

¹⁸ Daaci ba ezzlala-aara ge Maari mukse á emnde a Magdala na, a dateraa labare ñanna ge pukura-aha, a ba ñane á elvan ge itare: «Ya nanna Yaakadada!» A naba ndaterhe názena ni a bannaa Yaisu na.

Yaisu á maraterá ire-aara ge pukura-aha-aara (Mat. 28:16-20; Mark. 16:14-18; Luka 24:36-49)

¹⁹ Ba vaci laade ñanna maa, ta jamme ge pukura-aha am bere, am iga a mangaripu, ta naba zlanjete we á bere-aha bademme an tsekweram adaba lyawa á Yahudiya-aha wá, tá zhára ba dámda Yaisu, a tsaahé am dagave-aatare. «A vakurteva Dadaamiya hairire,» a ba ñane á elvan ge itare. ²⁰ Am iga a elva ñanna maa, a marateraa erva-aha-aara antara slerpa-aara. Daaci higa ge pukura-aha adaba naranna Yaakadada. ²¹ A ba ñane á elvan ge itare zlaɓe adaliye: «A vakurteva Dadaamiya hairire. Ba seke una ni a beliyaa Edderwa á sem duniya na wá, iya keni yá anƙwa belakurbela á dem huɗe á duniya.» ²² Daaci a naba futateraare effeya an we, a ba ñane á elvan ge itare: «Kwayaumbare Shedekwe Cudedɗe. ²³ Máki kwa yanaara kure haypa ge ura, Dadaamiya

keni yanarye ge edda-aara. Máki yakuranaarka ge edda-aara, Dadaamiya keni yanaarka.»

Yaisu á maraná ire-aara ge Taumas

²⁴ Am sarte na a sawa Yaisu áseza pukura-aha na wá, baaka Taumas palle á pukura-aha, Wulhe keni ba zhera-aara. ²⁵ Samsa Taumas wá, a ba pukura-aha umele tá elvan ge ñane: «Ŋere nanjeránna Yaakadada.» A ba Taumas á elvan ge itare: «Máki nanánka tate á kusa-aha na ta paslanmaa am erva-aha na á ba an ice-aaruwa, ya fem gulanda-aaruwa, máki fanemka erva-aaruwa am tate á upa na ta wanaa am slerpa na wá, ya fetareka ya ðekidëki ganakini tsetse am faya na.»

²⁶ Samsa máka-aara wá, jarammeje zlafe ádaliye pukura-aha am bere. Vacite ñanna wá, ankwá Taumas keni am dágave-aatare. Ta zlanete we á bere-aha an tsekweram, amá tá zhárá ba samsa Yaisu, a tsaahé am dágave-aatare, a ba ñane á elvan ge itare: «A vakurteva Dadaamiya hairire.» ²⁷ Ba a ndaase una ñanna: «Sawa an gulanda á ña, náwa erva-aha-aaruwa,» a ba ñane á elvan ge Taumas. «Sánsa erva á ña, femfa am slerpa-aaruwa keni. Yánya mága shaige mazla-aara, fetarfe á ba an jirire.» ²⁸ A ba Taumas á elvan ge ñane: «Ka Yaakadada-aaruwa, ka Dadaamiya-aaruwa.» ²⁹ A ba Yaisu á elvan ge ñane: «Ábi ka fetaara áte ya adaba nakina? Gedfa wá, tá sháná emnde na ni natika, amá ta naba fetarfe na.»

Názena ni ta puwete wakita na adaba ñane

³⁰ Yaisu a magaa najipu-aha gergere kwakya zlaɓe ádaliye áza pukura-aha, puwarteka najipu-aha ɲanna baɗemme am wakita na. ³¹ Názena ni an puwa am wakita na wá, ta puwete ganakini kwá fetarfe áte Yaisu, geni ba ɲane una *Almasiihu, *Egdza á Dadaamiya. An fetarfire á kure áte ɲane wá, kwá shá shifa adaba ɲane.

21

Yaisu á maraterá ire-aara am Galili ge emnde-aara vuye

¹ Haraare cekwaangudí wá, Yaisu a de marat-
eraa ire-aara zlaɓe ádaliye ge emnde vuye am
pukura-aha-aara. A marat-
eraa ire-aara áte we á
haye á Tibairiyas. Náwa a marat-
eraa estuwa ire-
aara ɲanna. ² Vacite ɲanna jarammeje pukura-
aha na am tate palle, tara Simaun Piyer an
Taumas ba ɲane una tá dahaná an Wulhe,
antara Natanayail ura ekse á Kana am kwára
á Galili, an egdzara á Jaibaidaiyus buwa, antara
pukura-aha umele buwa. ³ A ba Simaun Piyer á
elvan ge itare: «Iya yá zlala á de sluwa kelfe.»
A ba emnde na: «Ŋere keni ɲá dábakdábá.»
Daaci ba tse-aatare, ta demhe am paare á yawe.
Ta hare paɲɲe, amá slumarvaaka kelfe dɛkidɛki.
⁴ Ankwa á wera ekse, palaahɛ sledɛ maa, a naba
jesarhe ge Yaisu áte we á haye, amá diyarseka
pukura-aha dɛkidɛki ganakini ɲane. ⁵ Yaisu
a ndavateruhe elva: «Ba sluwakurvaasluwa
kelfe dawalaa?» Ta ɲwanante a ba itare: «Ba
palle keni shaɲeránka duksa.» ⁶ A ba Yaisu á

elvan ge itare: «Puwawumpuwa narre á kure á dem yawe am dalbe á nadafa á paare, kwá sluvaasluwa.» Ta naba puwumhe wá, slumarvaasluwa kelfe kwakya jipu, jaterviyaaje ge tefá narre na antara kelfe am hufe-aara, á dem hufe á paare.

⁷ A ba pukura na wayaawáya Yaisu kwakya na á elvan ge Simaun Piyer: «Una degiya Yaakadada!» Piyer ba a cenaa: Una degiya Yaakadada na wá, a tsakweme am nangyuwe-aara, adaba ndza tsekwesetsekwe, daaci a ebze-maa á dem yawe. ⁸ Daaci ta semhe ge pukura-aha umele á se tefá kelfe na am narre, ta yiyiyeka deme an kevaye an we á haye, á magá ba maiter deremke palle.

⁹ Saresse am yawe maa, tá zhára ba kára an mbe antara kelfe an puwa átekwa, an kwa depain zlafe á puwa. ¹⁰ A ba Yaisu á elvan ge itare: «Sawansa kelfe na kwa sluwanaa kure kina na cekwaangudí.» ¹¹ Daaci a dalemhe ge Simaun Piyer á dem paare, a de tefante we á narre an naha an kelfe-aha sadafde am hufe-aara na á sete haha. Kelfe deremke an kul ilyebe ju keye am narre nanna, aley tataaka narre defiddeki. ¹² Daaci «Sawmbare zaumiyuze,» a ba Yaisu á elvan ge itare. Amá baaka pukura na a slásla ndavanu elva ganakini ka ware. Adaba bademme diyareddiye ganakini Yaakadada. ¹³ A gaptehe ge Yaisu, a eksetaa depain, a tegaterhe, a tegateraa kelfe zlafe adaliye.

¹⁴ Ge keyire una, Yaisu an kwa á maraterá ire-aara ge pukura-aha-aara, am iga a tsetse-aara am faya.

Yaisu anƙwa á ndaan elva ge Piyer

¹⁵ Am sarte na zaruze duksa, Yaisu a ndavanu elva ge Simaun Piyer, a ba ɗane á elvan ge ɗane: «Simaun, egdza á Yuhanna, wayakiwáyá emtu ba kwakya jakuje ge emnde na?» A ɗwanante, a ba ɗane: «Wayanak-wáyá Yaakadada, ba ka keni diyakdiya ganakini wayanak-wáyá.» A ba Yaisu á elvan ge ɗane: «Eppiya egdzar kyawe-aha-aaruwa.» ¹⁶ A ndavanuhe zlaɓe ádaliye ge buwire: «Simaun egdza á Yuhanna, wayakiwáyá emtu?» A ba ɗane: «Wayanak-wáyá Yaakadada, ba ka keni diyakdiya ganakini wayanak-wáyá.» A ba Yaisu á elvan ge ɗane: «Faterufe hyema ge kyawe-aha-aaruwa» ¹⁷ A ndavanuhe zlaɓe ádaliye ge keyire: «Simaun egdza á Yuhanna, wayakiwáyá emtu?»

Mazle-aara Simaun Piyer fantaufe ge dzámá ire, adaba ndáva ɗanna a ndavanuwaa Yaisu ge keyire, ganakini wayakiwáyáhe na. A ɗwanante ge Simaun, a ba ɗane á elvan ge ɗane: «Yaakadada, palle á názu diyaŋka ka baaka, ba ka keni diyakdiya ganakini wayanak-wáyá.» A ba Yaisu á elvan ge ɗane: «Eppiya kyawe-aha-aaruwa.»

¹⁸ A ba ɗane á elvan ge ɗane zlaɓe ádaliye: «Yá ndak ba jirire: am sarte na zlaɓe ka dawale wá, ká eksantá ba ka kandá á ɗa, ká ɗgudese huɗe an ɗane, daaci ka zlála á dem tate á wedere á ɗa. Amá má watse gakevge emgyegwe a zhele wá, watse ká pelanse erva-aha á ɗa ge ura umele, á de takwasáká ɗane, watse á dáká á dem tate na ni wayaŋka na.» ¹⁹ Am huɗe á elva ɗanna wá, Yaisu anƙwa á bála jeba á emtsa na ni má

watse á emtsa Piyer na. Emnde kwakya tá de gálá Dadaamiya afaba emtsa-aara. Daaci «Sawa dábídába,» á ba Yaisu á elvan ge ɲane.

Elva á Yaisu áte pukura na wayaawaya kwakya na

²⁰ Daaci Piyer a zharaa ice á dem iga wá, á zhárá ba aɲkwa á dábaterdábá pukura na wayaawáyá Yaisu kwakya na am iga. Ba pukura na ndza á njá herzhe átevege Yaisu am sarte na tá aɲkwa arge masane, a ndavanu ge Yaisu a ba ɲane: Watse á veláká ware ɲane Yaakadada na.

²¹ Am sarte na nanna Piyer aɲkwa á dábaterdábá pukura ɲanna maa, a ndavanu ge Yaisu, a ba ɲane: «Yaakadada, una mu watse á shaná uwe kena ɲane?» ²² A ɲwanante ge Yaisu, a ba ɲane á elvan ge ɲane: «Ma yá kátá yá se beráná á ba an shifa am eptsa-aaruwa keni, una á shákaaka. Naba dábídába ka.»

²³ Daaci ta naba hyanme labare-aara am dágave á emnde a fetarfe bademme wá, ta bántsa watse á emtseka pukura ɲanna dɛkidɛki. Amá Yaisu ndahaaka una. Názu a banna Yaisu ge Piyer wá, a ba ɲane: Ma yá kátá yá se beráná á ba an shifa am eptsa-aaruwa keni, á shákaaka.

²⁴ Pukura ɲanna Yaisu a ndaha elva-aara na wá, aɲkwa á maganá ba ɲane an ire-aara seydire á labare ɲanna, wakita na keni a puwetaa ba ɲane. Diyaɲerdiya ganakini bademme á názena a puwetaa ɲane, bademme ba jirire.

Elva na tá zlá wakita na átekwa

²⁵ Kwakya jipu názena ni a maganaa Yaisu ádaliye na. Ma andze ta eppuwa bademme am

wakita, ba palle keni yaranseka wá, yá tama
ma andze á taa ɗanaaka duniya na wakita-aha
ɗanna.

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dec75dd5-4784-5059-aa00-668d508a6b0d